



ル 5  
063  
4



門 几 5  
卷



遊記第四册上

江陰徐宏祖霞客著

子南華子寄介立



同邑

季夢良會明編

後學薛希載次張

重校

揚名時凝齋閱

族孫徐鎮筠略

粵西遊日記 三

丑九月二十二日余自南寧崇善寺別靜聞下太平舟泊建武驛

二十三日下午始解維行八里泊窰頭

二十四日放舟西五十三里爲右江口右江自北左江自西至此會聞右江之流溯田州而上舟至白隘止由右江口北

望其內俱高涯平隴無崇山爲間而左江南岸則衆峰內突兀一圓阜頗與衆山異矣西入左江二里泊大果灣乃兩江中交脊盡處北有小峰三石圓亘如覆鐘山至是始露石形二十五日西南二十里爲楊美石嘴錯粵臨流又二十里泊

金竹洲上流野岸

二十六日西南十里過蕭邨入新寧州境石山復出若屏列若角挺瀕江兩岸奇石棋置競露崢嶸又五里東折江南岸穹石成洞外裂多門如猛獸羣立空其跨下北岸則斷崖爲峽飛梁駕其上兩端又五里仍西南轉與石山倏忽向背兩崖突石愈奇上下覆嶮如劈雲如肺葉降垂紛幻沓換但崖

洞未甚深擴竟成閣殿耳又十八里石山始在江南岸又三里西透兩山腋兩岸始石山對列舟挾江北石峰北轉而循其西麓於是東岸之南峰列三洞門北向北駢立兩崖崖壁兩疊疊各有洞是名獅巖南向爭雄北三里直抵獅崖下乃南轉二里又西一里逼一尖峰下仍南向西岸復有駢崖平削巍臨江潭者筆架山也而東岸石根愈透聳共三里過象石下泊新寧之西門自南寧來過右江口岸山始露石至楊美江石始奇過蕭邨入新寧境江左始有純石山抵新寧北郭江右始有對峙之岫舟行峰石中如梭度緯應接不暇且江抵新甯不特石山最勝而石岸尤奇蓋江流擊山山削成

壁流迴沙轉雲根迸出或錯立波心或飛嵌水面皆洞壑層  
開膚痕縠縐江旣善折岸石與山輔之恐後益使江山兩擅  
其奇余謂陽朔山峭瀨江無此岸之石建溪水激多石無此  
石之奇雖連峰夾嶂遠不類三峽湊泊一處促不及武彝而  
疎密宛轉在伯仲間至其一派玲瓏通漏別出一番鮮巧足  
奪二山之席矣

二十七日西南行八里江東岸石根空中上覆已屬剝境忽  
一轉雙崖前突岩石高連下闕如閭闔更巧幻中雄觀又一  
里冲江自東南來會南三里東岸一峰甚峭其北垂環腋轉  
截處有洞西向纍纍特懸空無路又西曲南轉其六里過那

勒余泊舟於此爲穿山犀牛二巖遊西南三里透兩峯下南  
至穆窰邨市肆西臨江澗穿巖在其南一里羣峰排列巖在  
峰半門西向攀崖石上抵門始西見江流橫其前洞直透山  
腹又見隔山迴環後門外翠壁掩映乃由門上躋踞其中扁  
則東西兩門對關上皆垂石駢柱凝結兩旁但其內西下東  
上故東透門高出西門頂自外望之都無所見必入門始知  
爲穿巖也兩門外俱削崖千丈矗立雲表而東門地勢旣崇  
壁尤峭趾尤峻所環對諸巖自門北迤邐東轉又南抱深谷  
若另闕一翠微境其下旋轉西去谷口崖石交錯不得窺下  
山過穆窰聞犀牛洞在騏驎邨邨依那勒東與穆窰三邨鼎

立乃東北三里至其邨邨人指洞在北山東峰上相去祇里許至其下不得路聞巖下伐木聲呼覓之不答時已過午雖與舟人期抵午返舟今卽舟去不能顧也乃盤山東北隅循大道行道西北皆石峰二里一岐北轉有燒痕在焉先是騏驎邨人謂抵山下燒痕處卽登巖道余謂在是矣益前趨北入山夾兩旁峰崖攢疊中平遂有車道循之里許道旁停車四五輛數牛布牧於麓樵者徧崖歷叩之俱不知有巖者蓋皆遠邨樵牧以車載至此過此車路亦塞入一里夾且東轉四眺重崖皆懸絕無徑西崖尤爲峻峭抵其北轉抵其東其二里環夾爲塢四面迴崖截嶂深叢翳之道遂窮出沒莽棘

中索終不得路仍西南五里返至騏驎邨大道旁前望隔隴有燒痕一圍亟趨之前至伐木聲處痕間有微徑石環叢隔故前不遽見今當在是矣益厲勇而前乃愈上愈遠西望南垂橫脊東突迴峰余皆已出其上獨一徑北躋二里路返逾頂北下翳不可行仍逾高頂返下至燒痕間見石隙復有一道望東峽上其間徑正造南突孤崖下始與騏驎邨人所指合凡三悞三返而後得之日色漸下亟望崖上躋半里抵孤崖北是崖危聳高峰南從東轉西向若獨角中突犀牛擬稱以此崖北一脊北屬高峰與東崖轉處對脊上巨石巍峙與獨角並而支其腋巨石又中裂豎穴嵌一石圭高丈許兩旁

俱石夾上復覆之若剜空特置其間者圭石赭赤迴別一山石色為尤異脊東下墜成窪深若迴淵上削崖四合環轉無隙踰脊俯瞰淵底南崖下有洞北向門高張內深不知所極四崖樹蔓蒙密淵底益盛崖旁有徑可循至淵底翳不可前使芟除稍盡可達洞腹則奇邃盡發矣日已墜乃踰脊西下由騏驎邨北西二里抵那勒下舟

二十八日放舟南行旋轉西北三里直逼雙峰石壁下再折東南五里小水自東南來入即穆窰也又西南一里過穿山西又一里西入兩山隙又五里江北岸山崖陡絕小峰如浮圖插其前山半綴一南向洞又六里界牌山蜿蜒江北西即

太平境蓋江之北岸新寧太平以此山分界南岸俱屬新寧也又二里舟轉北向西岸列岫嵯峨一峰前突俗名為五虎出洞舟遂東轉已復西北抵北山下循之西向行共六里過安定堡北山盡南山復出亦西循之三里隨山北轉過花梨邨又西北轉隨江北山二里轉而西隨江南山三里又暮行三里泊南岸晚夢邨各州五寨其間更設汛守又西行六里二十九日循南岸山二里北轉又三里轉而西又五里山開水繞百家之市倚江北岸曰馱盧屬太平崇善縣是日止行十里泊舟

十月初一日循馱盧西北五里北岸為左州界稍南南岸石

峰復突又二里西北轉乃見北岸石峰三里西南入峰夾間  
十里西岸迴崖雄削駢障江流南最高有三洞東啟極南一  
峰稍低上闕洞尤巨洞南崖石外跨自峰頂下插江潭崖南  
洞復透門出中崆峒交透舟行望之甚竒又南二里東岸石  
壁與之爭奇而峰壁合映江濼其間更爲勝絕又西南行六  
里已而東折則北岸雙崖高穹崖半各有洞南向南岸磯嘴  
盤疊飛石凌空無不穿嵌透漏二里西南轉上銀甕灘灘始  
有巨石中橫如壩西五里西北盤東岸迴崖二里抵北山下  
仍西南六里山開江曠一望廓然又五里而暮又二里泊捺  
利在江西岸屬新寧

初二日西北三里抵江北危崖下南七里響源水自南來注  
聲傳如雷源發自江州水之西岸卽江州屬新寧江州以此  
水分界水入江處有天然石壩截江口高十尺東西長十餘  
丈水踰壩墜江雖不甚高而雪濺雷擊勢特闊悍亦一奇觀  
也北岸爲上果灣有巖西向臨江上於是北一里北抵山下  
又西北轉兩岸山復出二里爲宋邨邨有八仙巖絕勝又八  
里西岸石崖疊出屢變竒態盈望又四五北轉西岸一崖障  
天崖半洞列雙穴東向如連環北大南小垂石外間通其內  
旣而大者愈穹忽劃然中剡光自後透洞前上下皆翠崖危  
疊倒影江潭南有馱槎邨轉登山後聞可攀躋又北一里東

岸臨江澗然者爲銀山劈崖截山之半斑斕綴色與天光水影相爲飛動覺陽朔畫山竟遜一籌崖下有上下二洞門俱西向上洞尤空邃中懸石作大士形上嵌層壁下瀕迴潭無從中躋其北紛竅甚多裂紋錯綴樹間吐納雲物獨含英潤一里轉而西遂止馱樸爲明日陸行計自入新甯至此石山皆出巴豆樹蘇木二種樹殊小巴豆葉色丹映每隊聚重巒孤懸絕壁丹翠觸望如楓葉着霜殷紅點染可愛蘇木則山凹平坡隨處俱生筴如扁豆子長倍之繞幹結癭點點盤結同垂乳土人以子種成林收買不至輒刈爲薪又擇其多年細幹者光削之乳紋旋結朶朶作胡桃痕色尤蒼潤余昔

自天台覓萬年藤一遠僧攜此云出粵西蠻洞余疑爲古樹奇根不知卽蘇木叢條也馱樸西至太平府陸四十里水倍之水源直通高平爲安南地由龍州換小舟溯流四日可至太平人呼之爲高彛問龍州山崖更奇其地分水至思明府東換小舟可溯流四日至天龍洞過山半日卽抵上思州州屬南寧府有十萬山山水西流爲明江出龍州東流卽出前八尺江

初四日由馱樸取道至太平南湖江八里爲新鋪江從正南來陸路遂西南轉又十二里轉一山嘴乃循山南麓西向行迴崖聯翩上壁極峻拔多玲瓏石三里路南復突一危峰遂



西入山夾又一里南登媚娘嶺東南五里路側石窰一圓曰龍井下墜五六丈四圍大徑三丈俱純石環壁墜空綴磴下底甚平東北裂一門透門入內水聲潺潺路遂昏黑踐崖捫隙下忽深不可測久之光漸啟迴見所入處一石柱細若碧笋中懸其間上下連屬旁有石板平度洞雖不宏旁奧窈窕得之路旁亦異也自馱樸陸行至太平輒見岡陀盤旋四環中墜深者爲井淺者爲田上下異穴彼此共窅蓋他處水皆轉峽出必有一洩水門惟此地明洩澗甚少水皆從地中透去竅之直墜者下陷無底旁通者則底平可植五稼路旁大抵皆是惟龍井下陷猶有底故得墜玩焉西南出山四里江

自壺關東垂北向至湖之南升降岡阜又西四里抵壺關關在太平郡城北里許麗江西自龍州來抵關之西南折繞城南東轉復北抵關之東乃東北去關東西正當水束處若壺項然相距不及一里垣之設關於中爲北門鎖鑰其南江流迴曲壺腹間則郡城倚焉城中縱橫相距亦各一里東西南三面俱瀕江余以下午抵關留憩關左映霞菴 青蓮山在郡城北二十里重巒北障天半其支南向東下者卽媚娘嶺西下爲碧雲洞洞在壺關正西二里石峰突兀洞穿峰半門東向先從北麓上三折坂東向透石隙曰天門得平臺焉洞門峙其上門狹而高內南轉空闊深暗上透山頂引光一綫

空濛下光下有太士龕北向中坐像後有窞深陷炬燭之沉  
黑又一穴南去不知其底此下層也其上層隔窞之南復闢  
爲門門前列雙柱上平度兩盆曰寶盆先由太士像右壁穿  
小穴南下窞側由雙柱中抵寶盆下透門入始頗隘連進門  
兩重漸轉東上則穹然高張天光下迸一門南向出爲通天  
竅厖級上出洞門外亦有臺甚平下瞰平壑與東向門無異  
由太士像左壁西穿小穴曲折入兩壁狹轉下伏爲隘門透  
門進忽上盤如覆鐘凡進四門連盤而上者亦四五處乃出  
於太士像左壁稍北又西穿小穴漸北轉則呀然中通山影  
平透裂一門北向號曰盤龍窟此洞中勝也北門外崖石橫

帶山腰東達天門西抵一飛崖下上覆下嵌崖不甚高上下  
俱絕壁中虛而橫帶者若干廊複榭無愧羣峰獻翠名北瞰  
深塢重巒前拱較東南二臺又作一觀由崖東攀石萼西望  
峰頂蓮瓣錯落中有一石東剝空明爲蔓深石削不得攀接  
仍從盤龍窟入出東臺仰眺洞南峰裂岐崖廻環一峽乃攀  
枝援隙上直厖峽峰攢合中復有東向洞內皆聳石攢空隙  
裂淵墜削不受趾俯瞰莫窺其底石塊投之聲厖厖不休下  
卽太士龕中承接靈光處也至此洞外勝始盡  
初五日聞壺關東四里有白雲巖乃由郡城東渡江經歸龍  
邨峒東抵石壁下穹崖高展下削如屏色瑩潔逾玉崖南峭

壁半列洞四五大小不一皆西向南面一洞較大下復疊一洞不甚深昧而上洞中空外削望之窈窕竟不得攀憇再南半里有洞甚大亦西向前俱大石交支從石隙透門入窪做可容三百人內無旁通竇洞北有小徑東上山夾兩旁削石並聳攀級而登踰山坳南亦有窪下陷木翳不能窺其涘其北更聳層峰西瞰江流域堞俱在足底再北直出白雲巖頂其坳中窪窳雖多然深莽密冒終不能下通巖半洞也此處巖洞特苦道路蕪阻若能巖外懸梯或疊磴中竇其委曲奇勝當更居碧雲上遂西出歸龍南湖江岸三里抵金櫃將軍兩山間金櫃瞰江峙崖洞中立大容數百人茅棘湮阨亦莫覓入洞道祇三週其東南北三面又再越其頂對矚江城若晰鬚眉於鏡中東卽將軍山片崖立峰頭迎江有干城赳赳勢環郡四眺峰之特聳者此爲最下渡江趨壺關山雨忽來暮色亦合矣

初六日余欲走歸順由富州入雲南聞歸順爲高平所阻意未決且從歸順行必假參戎馬牌方得前會庠友滕賓王肯畀書參戎道意遂留壺關菴中  
初八日有僧自南寧崇善寺來謂靜聞以前月二十八日子時故去余別時裁五日爲之哀悼終夜不寐  
初十日滕始以參戎馬牌相畀又爲余作諸土官書連日阻

遊記  
粵西三  
雨不得行

十八日始同顧僕出壺關北行關外有三岐東北向馱樸走左州西北走龍州今直北取中道太平州道也西北十四里登樓沓峽兩旁山崖陡絕夾隘頗逼踰隘少西下輒有塘一方匯水西行峽中二里踰二峽高倍於樓沓西下崖石嶄削夾深塢北一里上大峽陡絕更倍之踰坳北下夾壁截雲蔽日者一里塢窮西轉其北四山中墜下窪不測淵又西一里踰隘西下懸磴旋重崖間直下山脚幾千級按郡北有蕩平隘乃青蓮山中裂成峽者東南自樓沓峽西北出此中爲峽者凡四重兩崖重巨水俱穴壑底墜並無通流隙真阨塞絕

隘也既下循麓北行一深窅懸平疇中墜陷如奔上開線峽南北裂中跨石橋界爲兩其南可循磴下泉流汨汨仰望如處甕內引首窺天也北十里山始離立西北十四里小水東自嶺峽中西南去絕流而渡聞水聲動山谷余疑卽所渡上流忽見大溪洶湧路右闢比龍江之半自西北注東南下流與小溪合而去上流水懸壩石下壯齊湧雪蓋此江發源歸順州至安平州北又合養利思城二州水至此下抵崇善水口綿阜邨入龍江水口在太平郡西七十里云西四里水南層峰秀起瀕水一小峰孤突上分岐怒流橫齧其脚北則巨峰巍踞特當關扼之路抵巍峰東卽北轉共十里爲叩山邨

屬太平州境又西北七里暮抵太平站

十九日西十里渡江止太平州州西南峰俱峭立西北一峰特倚州後下有洞南向門突巨石

二十日西北六里過石梁水北流入江下俱石峽嵯峨西岡一銅鐘覆路左質甚巨傳聞重三千斤自交南飛至土人已不憶其年而色侔新出於鋤畧無風日剝蝕痕鉅已爲四川人鑿去土人謂尙有一鐘在梁下石澗中亂石磊落窺之卒不辨又十三里爲安平州江在州東北東南赴太平州去西南一山壁立觀音巖穹其下門北向高敞明潔四旁多玲瓏竇壁洞後懸壁上坐大士一尊下開兩門內復橫拓爲洞從

其右入夾隙東轉甚深窄以暗逼出大士座下右裂一門直透東麓座左拾級上從東轉跨梁飛棧遂出懸石巔西入則深竇墜峽已而南轉昏黑中久之忽南見光隱隱動望之前一門東南透壁出門稍隘門以外穹壁高懸南眺平壑與前洞頓異仍出前洞返州宿

二十一日取思城道思城在安平東北由安平西北抵下雷日半可達而東北向思城走龍英須四日抵下雷今安平西通下雷界者曰十九峴與交彛接壤慮彼竊掠用巨木橫塞道故必東迂二日於是由安平北一里與江遇江源出歸順州卽志所稱邏水勢比太平州減半蓋養利思城二州水尙

合於下流故也渡江有山橫障江北岸循山麓東五里路北  
一峰枝起如駢指其東北崖嶂間高裂中透特峻不可登穿  
山東峽東北轉峽之東復起層峰夾而東北去五里折而東  
東峰少斷處尖岫中懸如人東向坐忽一江自東而西石梁  
開五碧跨江上江水透梁卽東南搗尖岫峽中下邏水踰梁  
卽思城州

二十二日仍從州前西越五碧橋循江東向五里山峽愈東  
江漸小山峽東盡處有峰中峙南北俱有大溪合於中峰西  
水始大而成江又五里直抵中峰北北夾山始盡循北夾東  
崖渡一小溪湖中峰北畔大溪北向行夾崖中二里峽東西  
轉西峽有小水東入大溪乃越小水向東峽湖大溪北崖行  
一里舍溪登鼎促嶺二里至頂爲養利思城界北下又二里  
入谷底四山重護惟東面少豁向之行余以爲水從此出一  
里北渡溪水乃自東出西者竟不知西峰迫合透何峽去東  
北行山叢中巒岫歷亂共五里出峽始開大塢東西遙望皆  
峰頭矗合而南北夾壁有同幃幄極崔巍勢出峽北向三里  
橫度此塢直抵北崖下若無路可達者至則東北開一隙穿  
入之峽峰峭合愈覺宛轉難竟二里東山大開出達養利止  
數里從小徑北一里西北入北夾中南北兩夾山皆引錐怒  
籜俯仰神境者四里於是復開大塢南南亘南北兩界山如

南塢但南塢東西俱有叢岫遙疊此則前後豁然不知西去直達何地也東北斜徑塢中共五里至北山東盡處東山益大開爲龍英屬其東隔江卽養利養利西北至江止不及五里云循北山東麓北一里有小石峰駢立大峰東穿之卽西轉至是北條始見土山與南條石山夾成塢又三里止聳峒站自發足來已五日雖行路迂曲去養利止數里而所閱山川特奇且兼辰晴麗卽春秋不及也

二十三日北度塢抵土山共六里土山自西南石峯攢合處旋亘東去北塢復石峰特立東北繞石峰東麓二里一土岡復前橫西抵遙峰隙東則南屬於土山北逾岡水淋漓道間叢木沉覆無燥地下益深始知橫岡之南猶在山半也北下二里至平壑渡溪橋一里直北抵石壁下壁西裂一隙攀隙西登曰大輓南北石崖駢夾極峻西穿其間乃墜至塢底共一里半其處山壁叢合茂林翳蔽州人採木者皆取給大輓云西北三里半北望石峰間有洞並時俱南向路出其西北透峽多巨石夾道二里踰翠邨嶺北下東北二里有溪自西而東兩岸石崖深夾度橋東北透山隙出田塢間共七里復踰土山西北十里入山度石橋橋東北特峰懸削起曰牛角山極似縉雲鼎湖峰西北又特立一峰爲龍英東面水口山又西一里抵龍英州

二十四日候夫不至

二十五日因往遊飄巖州北數里外土山環繞中一小石峰如筆架南開平疇一塢大溪橫於前卽東入養利州爲通利江源下太平州合邏水者也水之東有山當塢立爲飄巖山聳拔州東卽前牛角山西北特立峰也山東崩崖之上有巖東南向高倚層雲下臨絕壁聞龍英被寇時州人悉避懸崖中交彘環守其下終不能上余挾導至巖脚攀登崖間轉一橫木度石夾而過輒有竹梯層層宛轉懸綴長短不一凡十四層抵巖口巖兩旁俱危壁下瞰惟巖口直下崩崖綴痕梯故得宛轉依之巖口上覆甚出由中洞入門甚隘已而漸高

中懸石拱把翠潤若玉柱旁又有兩柱上下垂接斷僅寸相對若天平針由柱左北入穴漸黑旣得東透光一線返由柱右東穿低竅出門與中洞並列爲兩西入暗隘中復穹然不甚深仍由中洞出外巖北杙一木透石隙間復開一洞東向內稍寬盡處乳柱懸樞細同柯節右有穴潛通中洞後卽東透光處也左稍下有穴空懸不知入自何所仍度所杙木厯梯以下下三梯復見一梯在梯左懸崖間亟援之上循崖端橫度而北徑狹僅尺長三丈餘外橫木爲欄崖窮又開一洞亦東向前一石自門左下垂數丈端懸小石一長三尺圓徑尺洞中高敞不似中洞低口暗腹也後壁環一隙更覺宛轉



卽上層懸穴下窺處徧探各洞久乃復歷十一梯下是洞高張路旁遠近見之惟州治相背反不得見余西遊所登巖險峻當以此巖冠貴溪仙巖雖懸空瞰溪然其上窄甚不及此巖崆峒而得水則仙巖爲勝

二十六日由州治前西南溯大溪二里石山復攢繞成峽八里踰一岡溪南始見土山與溪北石山夾而西涉溪南踰土嶺凡八里西南轉入石山中里許西過石峽連陟二石脊共五里仍穿石山塢中山脈自石脊南去攢峰沓萼叢結甚固直東南盡於安平由安平東北經龍英抵下雷凡迂數百里皆以此山支叢沓故也西登石磴又平行峽中始直墜峽下

磴道與澗水爭石共八里復與土山遇踰土山脊望東南隔塢皆石峰攢合翠浪萬疊升降土山中七里西南抵石峰下宿安邨食冬瓜土人以爲時物始知江南種當從此去  
二十七日西北盤陟土山共十六里及西塢復穿石山間又二里大溪自北而南溪之西卽下雷州州治開於萬歷間屬南寧府宜統志不之載州南北三十里西與高平接界治西大山外向亦本州地近爲高平莫彞所踞西爲州界者止一山州衝卽倚之其外皆莫彞境矣州南城外崇峰攢立一西南轉山峽者卽高平接界東南轉山峽卽隨州東大溪爲十九峴故道云

二十八日西北溯大溪二十里抵胡潤寨寨西南有大峽與交趾通界抵高平府可三日程西北長峽十五里兩峰湊合處曰鶯槽隘隘正西大山之陰卽歸順地日半至其州直北鵝槽嶺之北爲鎮安府地至其府亦兩日半程是日下午抵胡潤聞歸順道有交彞警乃決意返轅東北取向武州道鎮安與歸順近族也而世仇前糾高平莫彞破歸順擄州帥以去爲當道燭其奸僅贖州帥弟以塞責未幾鎮安身死無後應歸順繼嗣而田州以疎族爭之歸順度力不敵田反乞援於莫莫向據歸順地未吐今且以爲功遂驅大兵象陣代營鎮安莫彞過胡潤卽在是月十八日今其事未定不知當

道作何處分也聞當道遣官往詰莫酋酋厚賂之報云彼以仇閩無與中國事當道懼開邊釁亦曰土司交惡與中國事無與不知土司絕世國有定憲今龍英鎮安正宜如昔日太平立郡故事疆理其地若莫彞助歸順得鎮安而自取歸順地是中國自撤其藩籬而日近狼虎也此邊陲一大利害彼當道者烏乎知之

二十九日候夫未至散步寨署前後始見大溪之水一西北自鵝槽隘來者發源歸順南境一北自土山峽中來者發源鎮安南境合於寨前流始大卽志所謂邏水爲左江西北源南下安平出馱綿埠云

三十日下午夫始至湖北來大溪僅東北七里止南隴邨  
十一月初一日南隴東北一里渡大溪北岸溯溪二里溪來  
自東南山峽轟墜下兩山峽口巨石橫亘如堰高數十丈闊  
十餘丈奔雷傾雪勢極偉壯西南來未之見也水由此西南  
去路由峽北山塢東北上踰嶺四里復與溪遇橋跨大溪上  
溪北白石山腋中來橋北溯溪入卽鎮安道度橋東半里抵  
羅峒邨邨倚塢北石山下從邨東南山隙去又上英峒都康  
州道也余走向武道則直東去由邨前南渡溪循石山嘴東  
向上里半登隴上復見石山四合五里上嶺西北有土山排  
列北則來龍大脊與東南石峰分界東北去循東南石峰北  
平行其陰升降者七里下壑底東北入土山四里宿上梗胡  
澗境至是始盡

初二日北行三十二里過上控蕪邨東南折入石山夾三里  
宿那峽

初三日東半里當前有石山巍聳大溪自南峽透出經巍峰  
西麓抵其北折而搗巍峰北峽中東向去路亦循之倚崖阻  
水止容一人攀隘入置柵爲欄曰北岸寨東過寨南向循崖  
再出隘門南下東行山塢間南北石山排闥立大溪貫其中  
其東北六里循路右山崖東南轉始與溪別又東二里稅駕  
向武州鋪司土州守黃君一見如故遂歡飲十日

十三日始往百感巖先經瑯山東回望見東面懸梯乃新縛以升巖者晚出百感巖度橫棧未下梯有岐東循崖一巖在百感東晚不及上

十四日出州城北半里覓大溪溪卽枯榕江隨其支流而東遊瑯巖竟再往百感遊東上巖復從百感大巖內暗中穿洞北下百感邨湖水觀水巖巖外水深不得入約明日縛筏以進遂東北度橋由百感外邨東南踰嶺南出東來大路西入隘門過紅石崖下其北石山有洞南向甚崆峒月下其行五里還鋪舍

十五日東渡南曲小溪循東流有巖在路北循之將往水巖遇百感邨僧言邨氓未得州守命不敢縛筏乃返至瑯巖東北觀枯榕江三分水北爲龍巷邨北渡溪東隨所分北溪入山隘水東潛入穴憩崖上西向洞者久之

十六日黃君命人送遊水洞

十七日復以銀燭贈予凡留向武者十六日巖洞奇勝詳列於左 向武石峰其洞甚多余所遊者七爲百感洞又東洞又下洞又後巖水洞爲瑯山洞又下洞爲龍巷邨東北江流所入之上洞其過而未登者三爲瑯山東北二里中江墜穴之上高崖南向洞又爲瑯山東南二里南江所繞獨峰西南向洞又爲州東北巨峰南向洞洞在紅崖峰北其聞而未至

最以奇著者尚二爲向武西南三十里上英洞界吉祥洞洞前後通明溪流其間又東南二十里風輦洞共十二洞云  
枯榕江卽州北大溪自西南境東經北岸寨抵向武北龍巷邨前江東石峰一枝東西列江當其西垂分爲三北支東循石峰北入峽爲正派東循石峰南者爲中江南支直東南流田塍間爲南江入峽者東北五里山勢四逼東搗入石穴中北透其下爲水洞循山南者忽下墜土穴亦北通百感洞南行塍間者東遶平疇間兩獨峰南又東抵隘門嶺西麓北折直趨百感東洞下稍東入峽亦下墜土穴北入百感三流分列石峰西隔山岐壑皆復合百感一巖內北出爲大溪始東

北流經土上林縣之刁邨入右江 百感巖在州東北七里巖西南卽分水橫列山中江水所由入者東南卽隘門嶺北邇而屏於東南江水所由折而北入者西北卽巖背環爲龍巷邨東入塢北江水所由下搗者東北乃此山後門繞爲百感邨衆江合於巖中北出者此巖外四面也巖則中關於山半南通二門一前門一別穴皆隘北通後門甚拓而北面層巒阻闕不通人間故自州來必從南門入初抵山下東北攀級上仰削崖高數百仞杙木橫棧同雲氣出沒西上危梯三十級達崖半得坪一掌東緣崖端石級左爲東洞道入正門則西踐棧棧闊二尺長六七丈石崖上下削立無少痕竇虬

枝古幹倒懸上輒就之橫木爲杙外籍樹杪而內者則鑿石  
壁架長木梁其上削短枝鋪之又外就垂藤爲纜索資人移  
踐棧上懸枝外時時下窺絕壑奇險甚劇棧西盡又北上懸  
梯十餘級入洞前門門南向高三尺五寸闊半之僅容偃僕  
入下丈餘中平石柱四環爲一室旁多細穴延光外爍宿火  
種於中爇炬由西北隙下下懸梯三十級底開北夾上益峻  
梯脚一小穴伏壁根南透出亦明室一圍在前門下層當懸  
棧下由北夾入路西穴平墜深不測乃循東壁行西壁下窪  
穴益多斜傾西墜深入可下通水穴然流沙圯瀉不受踵由  
夾東又北過下隘下懸梯三十級底復平曠石紋粼粼俱作

荔枝益其西懸乳委蛇攀隙入如穿雲葉稍北轉西上望微  
明躡涉坂從之透隘西出則南北高穹赫然大觀此處內抵  
西南爲偏門外抵東北通後門長四十餘丈闊十餘丈高二  
十餘丈上皆倒垂乳柱紛紜無慮千萬紀兩旁懸臺卷室檣  
榭縱橫覆殆無曠隙由東崖躋入西南洞底上層龕龕西則  
偏門光自頂射矚耀幽壁攀峻峽西上達偏門門西南向頗  
隘下臨無地惟樹杪叢雜沉壘石間岨嶂懸截不辨其處爲  
前山爲後山也西龕旣窮仍東北下趨後門門東北向高二  
十丈門外兩旁石崖直墜山脚爲水洞門門內洞底中陷亦  
直墜通水洞陷處徑一丈五尺周圍如井井北巨石東西橫

高洞內者五尺當門爲之闕由井東踐闕北上踞門之中內  
觀洞頂目厭雲物外又下俯絕壁立重淵破壑中采色艷絕  
此闕內井外峽下透水門正作一架空石梁第勢極崇峻無  
從對矚耳闕東透石隘東北下磴倚絕壁壁石皆崆峒樹根  
穿隙怒發磴斷處間橫木以度下半里至百感邨餘勝猶攝  
目不得合西來第一無以易之也 百感東巖在百感前門  
東由棧東危崖端緣石痕一縷東數十步得洞門亦南向內  
不甚深然高爽窈窕石備五采詭裂成形峽中東入三四丈  
輒北轉石特中峙踰隘進漸昏黑中又南北成峽深十丈底  
平上峻北盡處多巨柱迴環其外通明躋級北上一竅欹側

東透僅納天光由竅內北轉又連闕二室一室中通外障乃  
由此北達者一室則北盡東向先入中通室西隙俱旁環東  
亦多瑣穴外徹紛光綴引北透一隘達北室前遂虛敞高門  
門東臨絕壁矗竽中立北復有懸崖倒垂於外下聞水聲潺  
潺則南江北轉至此由其下入穴室內西壁羣乳環爲小龕  
皆編竹架欄疑昔人棲隱所 百感下水巖在百感洞後門  
下百感邨之南百感有內外兩邨山從百感洞分兩界北向  
迴環下成深塢水出巖爲江曲折北去邨界於其間源闊土  
沃中豐腴產洞在內邨南二百步門東北向上卽後門也水  
自洞出前滙爲廣潭溢注兩崖石壁倒插水底道從潭中浮

後入洞頂飄緲似出雲表不意乃向所凌跨處洞內兩壁排  
空南向入瀦水甚深西壁一木梯懸嵌石間東壁石隙中拓  
有廬架絕頂而石壁削懸二十丈無可攀躋聞縛梯可綴壁  
上入洞十餘丈壑窮上峽懸透遙眺西南峽竇深入處日影  
熒熒浮動下峻不可及又不知所通爲山前爲山右也下壑  
石根挿水水面無內入隙水由下泛溢出其中衆水交合處  
尙崆峒內扁厯古竟無問津者返筏出洞從門外潭西躡崖  
登門左壁透峽上亦闢巖一圍東向下臨前潭右瞰洞水前  
眺對崖旁竇紛綸可橫木跨洞門度也 百感前下巖在百  
感洞前門下路西坑腋間門亦南向高拓如堂阜中多巨石

磊落後漸下值水漲時山前水亦自洞外驅而入今乃無滴  
瀝洞東北隅北進峽上透隙光下皆重石欽嵌疊數石下窺  
其底水淵然涵深竇石輒浮綴兩崖間遂不得循隙下架空  
入亦窮惟倚石內望西北峽盡處亦有返照光隙長且狹倒  
影浮動壁間亦不知所通爲山前爲山右也 龍巷東北塢  
上洞在州東北七里卽百感西崖第道由龍巷邨東入山北  
折成塢枯榕北支大江分搗塢中崖迴塢絕乃東墜穴洞正  
臨其上門西向左右皆危崖下臨激湍都無入徑惟由其北  
攀線紋踐懸壁入上下雲芝疊發東進五六丈後忽烘然中  
暄殆無霜且又三丈北轉漸上稍隘又三丈止中亦豐懸柱



不及百感林立下有九石圓潔勝珠散布坡坂間坡坂上紋  
皆粼粼縐鱗次簇邊隆起中窪圓珠堆嵌紋中如恒河沙數  
瑯山巖在州北半里形正如獨秀始見西向門三疊不知  
登道反在東峰半余至州黃君始命縛梯通棧攀東麓危梯  
數百級入東洞門豁然高敞門以內分三徑北徑平開一曲  
卽透北向門直瞰龍巷後北山大溪西來界其中抵橫列峰  
西三分之北面巒嵐溪翠遠近悉攬南徑反從洞門內東折  
出外復豁然卽東洞門側竅也一石屏橫斷放假內峽中曲  
達其內下有深窪循深窪上崖南入峽躋漸隘石梁上橫跨  
透梁下再上峽南盡東壁開穴度空延納倒影西竅高穹南  
透出爲南洞門前正與州東北巨峰對屏立當前不知其下  
乃通行峽也由西直入者高穹旁拓至十丈後卽側堰曲房  
爲隘門然其上盤蓋穹當隘處亦上裂成峽高聳尤劇透隘  
門西出堂西闢光明四溢以西洞門高敞特甚也堂左右分  
嵌樓龕至洞門石闕高阻透竅出始俯瞰門下崖穴層接如  
纍棋已出西望第三門最上下卽爲中門坐其上倒樹外垂  
環流下湧較南北門爲最暢 下洞卽在瑯山西麓門西向  
東入三丈餘輒止仰其上層穴競開懸巖頂凡疊門兩重余  
初至此望之深苦不上通明日又至亦不知上層可由東達  
并不知有東洞可級也旣而由南岐往百感出山之東回望

見梯已蜿蜒垂空始知上洞由東入但無通中洞道耳 向武多何首烏生石山穴中大有至五斤者余於州墟以十二錢得三枚重約十五斤士人皆以為馬櫛榔云

十八日始別向武州東過紅石崖下直東即出東隘可五十里至舊州又三十里為刁邨又三十里為土上林縣余從鎮遠道乃南入山五里南踰石山脊亦置隘隄曰屨腋下嶺入土山峽東南二十五里宿峒槽邨

十九日曉起半里過甯墟從南峽去抵天燈墟聞有營懷洞乃龍英分界為左右二江脊東十四里飯龍瀨邨地已鎮遠屬初至邨遙見屋角黃花燦爛以為菊疑無此盛逼視之乃

細花叢叢不知其名又見白梅一樹折之固李也黃英白李錯紅霜葉中亦仲冬一奇景東十七里又與石山遇循南崖入崖上石竇懸亂下壘石屬南山傍崖設隘門南北兩石山復崢嶸立其一里抵鎮遠州州屬太平府在郡東北二百里二十日鎮遠東一里出石山隘東北六里山夾開東西界俱深木密藤蒙障不辨土石北七里東踰土山嶺共二里為鎮遠信倫界東四里宿信倫州

二十一日東南二里有岫西南溯大溪乃結安養利大道為信倫入郡者正南一里東折入土山峽其處西為鎮遠來所踰石峰峭聚如林東為土山自信倫北南繞而西遙裏西面

石峰中開大塢亦自西南轉北去東三里登南嶺巔東望盤  
谷東復有石山遙列自東北環峙西南矣踰嶺東南四里一  
邨倚東山麓爲都結舊州其站夫絕黠詭與佶倫互委往返  
者凡五日乃散步邨前東隨溪入山峽里餘水西南轉墜深  
峽中東峰崖下有兩洞南向東洞頗寬邃一圓石界門爲兩  
右門爲大右入深十丈高三丈闊如之後壁北轉漸隘黑而  
中若穹然甚遠無炬不能入出從左南擴復分兩岐一東北  
一東南皆不深然明爽玲透有上下旁穿者上則青石穹覆  
盤旋竟尺圓石密布無餘地又黃石倒垂其間紋色俱異此  
中一異境也

二十七日夫始至從舊州東北七里上一嶺嶺畔多叢木木  
中行嶺上者三里林木少斷處下瞰左右旋谷中木合葉阻  
飛鳥不能墮下一里木山始盡一山皆黃茅彌望東十里踰  
二嶺得一平脊東從嶺北行漸入叢木出山南又度一脊南  
望皆石峰排列東南一峰尤峻出衆峰上過脊稍下輒東上  
直造前所望東南峻石峰北始東南下一里半及塢底兩崖  
壁立叢木沉翳循水穿峽一里峽流南匯成陂直激峰足又  
一里始東南出峽東十三里都結州治倚南山麓土守農氏  
求余作兩院申留飲者三日

十二月初二日乃行東五里一石峰東峙峽中先是南北兩

遊記  
粵西三二  
界山自州西八里卽排闥而至至此則東石峰中峙塢始盡  
由石峰北東走北塢十二里復穿山峽峽甚逼石骨稜稜刺  
人趾不堪着足出峽路忽降而下已復南轉石壑中高下亂  
石共三里山漸開路左石穴曲折墜成兩潭清流中瀦心目  
怡霽東折五里北渡一西來溪溪水穿石壑中路隨之水石  
交亂從溪北轉入北壑共二里水復自南來又渡之東東一  
里水復自南而北又渡之乃東向出峽忽墜峽直下者一里  
下山是爲隆安界亦爲太平南寧兩郡分壤處乃知都結地  
直在西山頂也北溯溪一里得巖邨民居始有瓦房高橈如  
見漢儀矣南行六里抵西界石山下峰皆尖若卓錫巖有中  
空者行石山下嵌石中南四里乃循東界土山東南五里宿

巴潭邨黃姓家

初三日東南踰土山共三里溪自西北石山下東來汨汨有  
聲南隨溪一里西南平壑大開西界石山至此南盡而石猶  
未盡於是平疇曲塍中怪石森森詭離詭合高下不一流泉  
時激之環以畦塍使置一椽其中石林精舍勝無敵此者行  
石間一里得邨曰把定東北六里至隆安縣縣城在右江西  
南岸余前至南寧入郡堂觀屏間所繪合郡圖此縣繪右江  
北故余自都結來以爲必渡江後抵邑至此乃先邑後江非  
躬遊殊域則郡縣圖殊不足憑也地多巨竹徑尺餘土人以

爲牢柵婦人每擔四竹筒汲於溪筒節長至四尺縣北關外  
爲鞏閣右江自西北來經閣下東去江涯深峭遙望竟不之  
見涯下得南寧舟期明日發

初四日舟忽改期初入遂以初五定擔夫爲步行計

初六日夫至始行出城南六里士山南盡一石山如錐中央  
立南六里又抵一石山下山自北遙望若屏列近循其西麓  
愈見平展已遶其南復東向三里山忽東西兩壁前環中央  
則北壁後遜皆削崖布空三面圍合南獨缺前復有土岡橫  
接兩峰盡處爲當門闕焉先按百粵志記隆安有金榜山合  
沓成城至是心異其山問之皆不知所謂金榜者問此山何

名第曰石巖山也余乃北半里踰土岡下直抵北崖脚東崖  
上兩裂透壁光若日月高懸又望西崖頂裂罅層懸疊綴嵌  
空天半乃先從北崖麓入一門門南向嵌壁可層纍上內不  
甚寬而外皆疊透連躋二重猶飛軒下臨爽朗可想左轉一  
罅西裂最深直自崖巔極麓底攀夾縫僅可脅肩上乃下趨  
西崖懸扉門東向仰眺皆崇崖莫躋惟北崖有可攀線痕乃  
逆上兩盤短峽下復上始凌洞門門以內隙西北穹起門外  
隙直從崖麓墜下峽深數十尺前巨石立掩之故自下望祇  
知崖石懸立不復知內有峽也然峽壁峻削上俯之不得下  
卽欲攀入門內隙亦傾側難措手內窺漸暗於是從舊法攀

緣下南出大道過路左魚輿邨邨人勞余曰遊金榜大洞樂乎余始知金榜卽此山亟問大洞云何曰是山三面環列惟西面如屏大洞在前崖後高峰半中關四門宏朗靈透余乃悟所遊者爲前崖小洞尙非大洞也東南七里右江自北來隨之南下抵江畔一水西自石峽中來注水亦深廣可勝舟但峽中多石不能入耳下有渡舟曰龍場渡渡谿東南二十六里至那同邨宿

初七日東南三十七里抵平陸邨已爲宣化屬暮黑行四里至那吉土人呼爲屯吉云

初八日二十三里至宋邨卽來時左右二江夾合處南面臨左江爲大果灣宋邨正在兩江夾中實卽古之合江鎮上人莫存其名矣東一里卽右江口路從東北一里半渡右江南望兩江合處在半里外正猶前日舟過右江口內望此地也渡右江東岸東北四里兩阻王官邨

初九日淋漓雨中僅行二十三里煨溼木爇衣羅氓邨初十日東南十五里至南寧崇善寺聞靜聞永訣事歿在九月二十四日酉時止隔余行一日耳寺僧引至窆骨所拜哭之南顧橋上顧奴行李適至遂寓城外梁店一別南寧已七十五日矣

粵西遊日記四

十一日余在南寧行道莫決聞靜聞訣音必窆骨鷄足山遂至崇善寺拜檢骨起置大竹撞間北取慶遠府由黔入滇道十九日乃行以積日雨阻今始得夫也出南寧朝京門東北六十里至施澁驛

二十日由施澁東北十七里爲韋邨朝着山如展列邨後按郡志東八十里有橫山高險橫截江卽此山南走截江特立者也宋置橫山寨爲市馬所又十七里溯流入山峽峽東處截塘堰水兩崖山甚逼曰關山土人又名爲山心按志崑崙關在郡東北九十餘里必此地無疑然土人皆謂崑崙關在賓州南謝在杭百粵志亦謂在州南十里在賓州南者乃古

漏關非崑崙關也世因狄武襄駐賓州以上元饗士夜二鼓破崑崙遂以賓州古漏當之而今在南甯者皆以崑崙爲關山在賓州者又以古漏爲崑崙若崑崙果去賓州十里則兩軍已對壘武襄十日駐飲二鼓起破之及曙反不足爲神奇矣又十五里抵長山驛又十里宿裏段墟

二十一日北十里東入一隘門門以內屬賓州爲柳州南甯分界處土人名隘爲界牌嶺又指爲崑崙關按志崑崙爲南寧地去郡東九十五里此與賓分界去南甯已一百二十里今經行者見其處有隘遂以崑崙當之故西事洱云崑崙關不甚雄險其上多支徑欲守崑崙須慎間道亦悞謂此也又

十六里小水自南來東渡之爲上林縣境自界牌嶺至此皆屬賓州獨此水東又爲上林屬以上林思隴一驛孤懸其中也過橋東北升陟岡陀四里抵思隴其地東西南皆賓州境惟西北五十里達上林驛南面曰高尖山北面崇山並障東曰北斗山西曰晒麴嶺遙山層疊正西者曰陸蒙山溪自界牌嶺東北至此扼於北山遂轉西南去惟陸蒙隔於溪西也由思隴東下塢南北皆崇山逼夾乃高尖北斗二山東垂也東二里半至二山度脈脊水遂分二派脊東北者入都泥江西南者入右江爲黔鬱兩江脊踰脊隨水行峽中峽甚束半里稍下復爲賓州界蓋賓州之地東西夾思隴一驛於中屬

上林南界者橫過僅七里耳既下山愈逼路益東轉已越高尖山東麓按志賓州南四十五里有古漏山古漏水出焉其關曰古漏關當卽此地然土人無復知者隨水東北出峽三十里至山口溪北山東盡溪南山亦漸東南轉其東平疇齊望天嵐空豁萬山阨塞中乃有此浩蕩區東可十五里至賓州州在平楚中謝肇淞謂崑崙在州南十里此何據也余取三里道從山口北渡溪二十里至公邨

二十二日公邨北越山七里西望雙峰峻極雲表者大明山也山在北斗山西北爲上林武緣分界北渡大明山大溪共八里登思落墟西北二十五里至開籠山一名鷄籠由此西



二十里可抵上林縣余自隆安西嶺入土山崇卑不一皆壤  
阜無片石至此復覩崢嶸面目矣北入石山峽中山千百爲  
羣離合競變有分三岐者東岐大而高中次之西岐特銳細  
若竹枝詭態尤甚有聳立眾峰間卓如簪筆者如此者五里  
北至洋渡大溪由上林西北崇山中東流至此直逼溪北石  
山下又一溪北自三里山峽中南向入大溪二流合其溪愈  
大循石山東抵遷江入都泥江焉舟渡北山下稍東溯南來  
溪西岸入峽十里峽復大開四山爲大塢一峰當塢起平疇  
中道經其西北三里度桂水橋水自西北激崖南崖瞰溪臨  
橋上又二里抵三里城城建於萬曆八年設叅府移南丹衛

於此以鎮壓入寨云 三里東西皆石山排列自後營分支  
南下中有土山一支至此盡叅府卽倚之建牙城久頽且無  
樓櫓鎮江陸叅戎駐此六年增葺雉堞創三門樓南門外又  
建南樓壯一方形勢又前則東西二溪交於滙水橋俱發源  
後營東西谷西大東稍遜合而下洋渡而獨山巖又中峙爲  
下流鑰前又有獨山邨之山爲鑰第二重 三里四境南踰  
洋渡抵雞籠山共二十里北過後營抵分脊嶺共五十里東  
抵周泊隘共二十五里西抵蘇坑共四十五里縱橫皆七十  
里名三里者以昔爲賊踞王文成平入寨始清出之編戶三  
里一曰上無虞二曰下無虞三曰順業里曾置鳳化縣隨廢

設衛與叅府鎮之田糧初輸衛後收歸上林縣民以不便復紛紛議歸衛矣 三里以洋渡爲前門李依江西自上林大明山發源東至此橫爲洋渡渡南石峰離立若建標列戟渡之北則石峰迴合中開一峽小江自北來南注洋渡下流卽匯水橋下合流水也溯小江入峽宛轉石山中北數里兩界山漸拓平疇中開獨山邨界其中一石山中立溪西爲外案又有獨山巖爲內案北面石山愈開土山自北來結爲城治其東西兩界石山迴合如抱愈遠愈密殆天成石郭蓋西來巨脊高峙爲大明山分支東走遶蘇坑南北者爲西界障又北轉東抵後營乃中抽土山一支直南四十里結三里城其分支東度者又南轉環遶爲東界障故周泊蘇坑兩地爲三里東西腋正中與城治相值其處東西最拓由周泊而南漸轉漸合至洋渡西向臨溪則青獅廟後崖也蘇坑南下亦漸轉漸合至洋渡東向臨溪則白崖堡東崖也二崖湊於洋渡爲三里城之前門 東西兩溪俱在兩界石山內土山北自後營盤伏來兩源遂夾與俱西界者南至羅墟北又合一西來水曲折遶城西抵石邨併汎塘水東南出匯水橋下合東溪東界水南至琴巖東又南出琴水橋合一東來水曲折抵東南石峰下又穿流山峽中乃西出合西溪二水合而南灤兩獨山又南注洋渡東併大江東去西北夾卽洋渡東北夾

爲青獅廟後崖 仙廟山在城西四里西面石峰之最近城者石峰中懸三面陡絕維從西南坳攀崖上則三里四際盡在目中昔有邨氓登山樵採遂仙去故土人廟祀之 汎塘浮石在城西五里汎塘中汎塘者卽仙廟山南塢也自仙廟山前西接佛子坳塢中塘長數里水漲時洪流漫衍巨魚逆流上土人利之故障爲塘而不畝其地當塘之中有石壑一區上浮如敗荷覆葉支撐旁偃中空漏水一潭遶之石箕踞其上去水不及三尺極蜿蜒分合勢西北里許卽汎塘邨邨倚北山下 汎塘後塢石洞在城西七里西山東來過佛子嶺分爲兩支一支直東爲汎塘邨後峰一支北轉爲韋龜山

一山東北又環成一塢東以仙廟山爲前障中有支峰對其麓一洞東向前隔水內望甚深中可容千人所向東峰上亦有西向洞高懸欹側皆翳沉莽中俱未及登 韋龜洞在城西十里韋龜邨西由汎塘踰佛子嶺北其道近北由羅墟轉石山嘴而南道較遠五里其中羣峰環遶內拓平疇小水自北趨南分流石穴去惟北面石山少開亦獨峰中峙爲之標韋龜山中懸東南直北向對之函蓋獨闢山水皆逆捍洵世外丹邱也數十家倚山北麓以造楮爲業棲舍纍纍高下層嵌石隙望之如仙西卽洞門亦北向初入甚隘閭西南下數步透出石隙忽穹然高蟠內朗四際博通頂有懸空穴天光

倒映正中墮北向躋石上乳柱前排環一平臺可布几席拾級南下滙泉碧黛中用周邨汲平臺前西多森立柱幢蓋縱橫文采瑩潤東則怪石磊落如獅象交踞不少遜內復可左右深入秉炬由右西向入漸下漸南岐可半里又開一壑間由壑梯險上入甚深以覓道不得復由左東向入北躋半里轉一竇返三里雖巖谷絕盛固當以是巖冠况巖外邨居又擅桃源谷口之勝乎 佛子嶺北巖在城西七里汎塘邨西佛子嶺者石山分支東出爲汎塘仙廟諸峰嶺界其間石骨嶙嶸踰嶺北下韋龜邨西塢水南流抵其麓傾入洞洞門北向甚豁中迴環成潭潭水際四壁時久霽溪涸入無涓流

潭中潴水特澄深不可測潭四週皆石壁無隙聞其南隙伏水下大潦從北下擊洞滿不能容則躍出於山南崖門右穿旁竇南抵潭東涯上一石高若潭旁上懸洞頂不及尺若鵲橋坐瞰深潭橋石下更悠然也 佛子嶺南巖門南向前有石澗天成若槽橋橫其上時澗中無水卽由澗入洞洞外高巖層穹側裂不能宏拓北入洞僅受一人中甚黑而光潔類琢磨者入頗深卽北洞洩水道水盛北洞中滿水從下反溢出激湧勢壯故洞與澗皆若磨礪以成云 佛子嶺西北巖去佛子嶺西北一里門東向韋龜邨西塢水自北來又分流一澗西抵此洞前穴地墜洞乘水上臨外門危朗入可三四

丈輒止洞南又一隙傾側下下漸黑轉西南向無炬出聞下  
與水遇循水西南炬行卽透出後山乃知此邨水墜穴山透  
腹亦與向武百感同也 琴水巖在城東六里琴水橋北中  
支土山東南盡處也東自溪北來環山東土山旣盡獨露石  
山一拳石參差層沓山南亦有邨數家洞在邨西山半門南  
向初入甚窪下北進數丈秉炬踰一隘西轉始穹然中高西  
透明穴上垂柱繽紛當明處平石闊三丈卧洞底可攀憩躋  
西穴出則山之西面也下山仍轉出山前騎周玩之洞前稍  
下又東開一洞門亦南向邨人以爲積薪寮北又開二巖上  
下立上者托重巖苦無徑下巖多潛水然亦不能與前通也

周泊隘在城東二十五里東界石山脊也隘當脊中南北  
崇崖高壓東踰隘卽遷江境其東北石山內爲入寨之羅洪  
洞東南石山內爲馬腸洞地無居民皆巨木 獨山巖今名  
砥柱巖在城南四里此地有三獨山皆以旁絕附麗得名一  
在溪東岸與東界石山近一在此山南五里障溪而東環之  
獨此山高正當中立與向武瑯巖絕類省中獨秀無此峭拔  
透達也巖當山腹南北透南門尤高進前有巨石自巖頂分  
跨而下界洞門爲兩正門在東偏門稍西南皆有古木虬藤  
倒掛其上每輕風搖曳香翠欲流巖中合掌起高數丈闊一  
丈五尺平通山後者五六丈南北徹眺衆山無不羅列出北

竅上飛崖倒覆又分竅西透亦北轉通一門內架閣兩重上穿圓竅入下竅行若透橋出又闢西向洞一洞四門相通小峰乃出此殊幻惟東面不通而崖外一門東向西入深數丈是又分門立戶者 小獨山巖在城東南五里與砥柱東西夾溪立自砥柱東望似此山偏傍東界自此山西望又似砥柱偏與西界近平中望之兩山去東西界各懸絕等也山小於砥柱尖銳特甚極似一浮屠中立下亦通一門石外跨西透小隙上懸崖側峙平石為臺上斗絕處有洞南向極深若能階梯上亦異境也遊砥柱日獨隨一騎浮江并盡此勝 砥柱巖西峰水巖在城南四里有峰兀突砥柱西高不及砥

柱迴列倍之上冒下削其淋漓痕儼若黃熟香片側立南多空裂成門北麓洞北向兩崖合掌上並內深杳有光南透若甚崆峒第洞口瀦水溢兩崖不能入策馬渡水水多亂石不能前 堡北巖在城南十二里巨堡北堡南去洋渡僅三里洞門東向深六丈後窪下不能深入 獨山邨西北水巖在城南八里大道西門東向洞口危石磊落欹嵌正倚西山下中窅然沉黑竟不得入也 白崖堡南巖在城南十六里由洋渡北岸西溯江轉入山塢得白崖堡山南北迴合又成一洞天洞在南山重門北向高綴萬仞壁自堡中仰之即在目眦末無從着足崖底石脚下插亦開裂成紋初攀數隙如

升重樓復出望之始知去洞猶極遠土人秉炬前導仍出山口循南山東抵南麓拾級上得一門東南向爲後洞正對卓筆青獅巖諸峰洞內東北上躋甚暗更北上益峻遙見天光中引愈攀躍以升得掌大隙瞰隙外卽闢巨門則上洞下層也隙隘不受側身過樞供俯眺而已內更上躋透隘出一洞門呀然北臨無地向仰眺莫可及者今忽躬立其上此洞最高前夾崖下陷假以木橫架補其闕卽堪托憩凭挈諸峰也仍下內隘再外窺第二層洞已置爲必不可到姑以杖從隙中投之由故道下抵前遙見天光處明炬徧燭洞北崖下得一穴亟引炬蛇行入中漸高成峽數丈後宛轉東折又北透

數丈其門北向高裂巨樹盤根洞中偃出洞外爲第三層洞洞前平石如掌上下皆危崖峭懸絕級上眺層門重疊出數十仞巔卽上洞與第二層洞也稍緣平石而東峽壁間藤樹蟠絡乃猿接以登久之竟歷第二層外洞前所投杖儼然在洞深三丈高五丈嵌上下兩洞間獨不中通必藉外躋始達倍覺幽峭 白崖堡南山下洞在後洞西三百步門亦東南向洞外高崖氤氳內橫分二道一西南一東北皆下從窪中入必以炬西南者數丈後輒分兩層下層一井大穴由井下墜卽得平峽西行三丈又懸峽下墜得平窪中峽竅盤錯乳柱花萼垂垂圍簇者千萬計又白乳蓮花一簇大徑三尺細

辦攢合逆懸洞底根平貼上石懸一線盤折久之忽明光一縷透竅出井口如前在前井之南矣又從上層西南入中石脊高下屢見下陷坑窞無底疑卽前所探下層也深人亦盤互多乳柱細若駢枝團聚每千百枝惟後營東洞乳柱多而大悉作垂龍舞虬狀比列皆數十丈云於是從東北進不五丈有北嵌竅兩重俱淺東向攀崖上進漸曲盤錯亦如西洞深奧少殺耳 青獅南洞在城南二十里西南與上林分界處路由洋渡過江東南四里乃至其山石峰卓立洞在山下開東西二門東門坦下門高數丈闊亦如之直透山西者三十丈平拓修整下闕如砥幔覆其上間有石柱倒挂幔下洞

西垂又石柱一隊外自洞口排列抵洞後西界別成長榭從榭內矚外洞如疏櫺綺牖牽幙自蔽西門特崇峻下巨石盤疊爲臺上忽中盤高穹從臺內眺已不見前洞頂祇覺四面層繞皆雲氣噓鬱時有竅穴鈎連空懸無上處外眺則西面三岐卓筆諸詭岫正近當洞門設之供由臺北下與窟中復開平洞一圍外峙巨石爲障下透中虛若橋之度空從此秉炬北入東轉穴大而易窮東從脇隘直入計其止處當不下十五丈已踰外洞半此下洞最奧處也出坐臺上仰視上層冀一登不可得忽見北光墮影知其外通陸公令健捷者從山外攀崖索之久之其人已穿入其上呼曰速攜炬來尙可



深入余從之乃從西門下循山麓轉出山北南向攀崖躋山半有門北向穿石竇入俯見諸君酌臺上其上石砥平度石端懸空處復有石柱外列分牕界戶故自下望之綴竇不一內實旁通也於是秉炬東入愈深窅中闢幾二十丈東窮西北轉得一竇攀而北上忽倒影遙徹有峽縱橫駢沓南北峽一穴高懸僅納雲日光道絕升降更披西北峽上透得一北向門愈高吐納嵐烟其北腋尚有餘輿然所入已不甚遙乃由其門出欲緣石覓磴下下皆削立壁復從洞中故道降至懸臺下瞰處諸君自下呼噪人人皆以爲仙也 青獅北洞在青獅潭北岸青獅潭者即洋渡下流也江潭深滙爲羣魚窟

窟乃叅府禁沿罟網所不敢入者北崖亦多穹門與南洞隔江對余雨中過此不及旁搜又西爲青獅廟危峰西南來抵水盡江至此合流而東峰絕其灣愈見岷嶲廟倚山下遂極幽闕焉 後營東山洞在城北四十里卽後營東界石山西麓也去後營四里中又界小山一重山坳中斷處有尖峰在前亦曰獨山則其西護也直抵東山下小石峰一枝西附起遙見當峰半一門西向高懸則西洞後穿別竅正門尙在南腋間有兩門東西列皆南向先從西一門入中平朗若堂皇石柱後列從其東轉出柱後下墜小穴上則垂乳窈窕圍成龕極玲瓏纖幻龕中圓且峻貯水一池沉映崖壁光影上照

紺碧奪目穿西隙而入又闕後室高整與前堂無異門西向  
下臨絕壁卽前從塢中遙見高懸者旣乃列炬從東洞門入  
門外隘中窪入數丈輒巨乳夭矯垂空下續紛不一底甚平  
岐而西峽東隙皆不數丈盡惟直北踰乳隙進內復寬稍東  
折遇方石中橫諺號爲棺材石從石東北轉石坡高下乳筍  
參差立披竅北入復闕一最巨室乳柱迴環闔莫測道應  
從西北竅入余悞穿東南腋仍下方石邊聞此洞內透甚遐  
行至半日一大溪中貫上有空明倒影飛梁渡溪直出遷江  
云余欲挽炬復入從者恐束炬不給強余出計所入未及十  
之一也瑰麗已壓諸巖矣 三層閣在叅府廳事東陸公所

新構長松迴蔭羣峰四合松風亭在署右土山巔松蔭山色  
遙接城埤月夜尤佳絕余下榻三層閣幾至忘行陸公餞余  
於松風亭沉醉月中故以終記 三里週圍石峰中當土山  
盡處風氣含和獨盛於此土膏腴美生物茁茂非他處可及  
叅署四圍喬松百餘株高刺雲霄大可三人抱余疑數百年  
物考之碑記植於隆慶初建帥府時裁踰六十年其巨如此  
爲良區異壤可知所藝禾稽特大恒種一郭長倍之性柔嘉  
亦異庶土所植鴨大者重七十兩方體粵西鱮魚甚艱長僅  
寸此地有至尺者木棉樹最高巨粵西隨處有之此中尤多  
春時花大如木筆紅色燦然時有素禽羣啄四面繞之竹皆

中實外多刺叢生最大如吾地虛中者間有之然無巨者  
予以二十二日下午抵三里二十四日乃入謁陸公爲下榻  
東閣自後多雨無霽日二十八日稍霽陸公特同予遊韋龜  
巖後復雨至十一年戊寅正月十三日始遊兩獨山巖十五日  
雨中往遊周泊隘晚酌南樓觀龍燈甚盛二十七日同陸公  
乃孫伯恒遊白崖堡巖洞二十八日陸公昆仲至同游青獅巖  
既乃觀打魚江潭抵暮歸卧疴東閣者數日二月初三日雨  
中復往青獅潭觀打魚先是張揮使謂青獅巖南鷄籠山亦  
有大巖故陸公以騎送予命張同往張謂雨中不可入固阻  
余仍冒雨歸自後予辭陸公行陸公擇十三日爲期至是日

始治裝凡留三里者五十日長登山有小山入游  
十三日午後出東門度琴水橋共六里北向入山皆東石西  
土凡三十三里抵後營營在西畔土山頂巖間  
十四日東遊東巖出飯於後營下山北行兩界山仍東石西  
土小水南流兩山中經後營南西南墜壑去卽琴水橋上流  
也北八里土脊自西而東橫屬兩界中爲北南分水脊南入  
洋渡北入羅木渡焉自此而北昔皆三里民居今爲八寨賊  
踞北二十二里爲橋藍邨又十二里是爲周安鎮并西南古  
鵬北蘇吉總爲三鎮界入寨中者也今古鵬已廢周安亦僅  
數家倚溪西溪東膏腴俱爲賊踞不得成鎮矣

十五日隨大溪西岸北行石峰西突路左峰四面多開穴巖  
中空第高莫能上北又有荔枝巖深黑須炬入聞中有荔枝  
盆於是東西界皆石峰無復土山中間先北涉一小水又北  
涉一澗水皆東向入大溪共四里小峰當塢立嵌空多穴乃  
下流鎮山亦如三里之獨山但南北易位耳又六里抵蘇吉  
鎮復與土山遇又十八里一江西自萬峰石峽中破隘出東  
復破萬峰入峽則都泥江也剝木小舟二以渡江闊與太平  
左江隆安右江畧相似兩岸甚峻江嵌深崖間所謂北盤江  
也土人云自利州那地至此北渡江飯羅木堡屬慶遠府  
賓州慶遠分南北以此江爲界堡北有小江南入都泥湖小

江三十里抵高陽站站西石峰後卽猺窟其西有彝江卽羅  
木渡上流也

十六日北二十里東西兩界俱石山西界石山突東出曰橫  
山乃忻城縣永定司分界處緣山嘴盤崖北轉密樹蒙蔽磊  
石上上下下莫可窺眺偶瞰路下石潭淵沉仰見雲障排空高  
下隱現令人愴恍二十里至永定司又西北十六里踰石山  
如門西望擴然則永順司接境南卽石峰叢合皆猺窟北循  
石山西麓升降土阜上多迴環中窪如塘如井俯不見底水  
由地行此其中墜處一如太平府所見北七里歇東峰麓草  
塘邨

十七日北三十里抵慶遠府之南門 慶遠郡城在龍江南  
龍江西自懷遠鎮北憑空山透石穴出循北界石山而東流  
少殺羅木渡兩岸森石嶙峋過之江北石峰聳立曰北山中  
爲會仙東爲青烏西爲宜山又西爲天門拜相山卽馮京祖  
墓皆憑臨江北中復開塢直北趨天河縣名者也江南卽城城  
南五里石山一支自西而東曰南山中爲龍隱洞山東爲屏  
山西爲火號山又西爲九龍山皆蜿蜒郡南爲來脈 西竺  
寺在郡城西門外殿宏壯爲粵西所僅見南爲香山寺寺前  
平地湧石環列爲門爲峽爲峰爲障甚微而幻且小峰頂每  
有巨樹箕踞其根籠絡與石爲一幹盤曲下覆極似蘇間盆

玩寺西一池中亦有石池西北爲黃文節祠後有卧龍石前  
有龍溪西流焉 龍隱巖在郡城南五里石峰東隅廻環北  
轉處也前三門俱西向後通山背亦有三門俱東南向其中  
上下縱橫無不貫穿今中道交通處以巨石窒穴洞遂分而  
爲兩北偏一門最高敞前有佛宇南偏二門在山腋間其中  
門已無路余先從南門入遂北透暗穴反從上層下瞰得之  
無從下仍出南門攀搜到其處再攜炬入遂盡其奧曲 北  
門西向高穹前列佛宇三楹入數丈洞稍隘偏南遂昏暗秉  
炬直東入又數丈有岐在南崖上攀木梯以登南向入一窪  
下陷如穿橫木板以度又南西壁下紋一縷緣崖根卧鱗脊

蜿蜒似龍形隱起又南數丈踰隘俯石級下墜下層穴亦開  
南北塢南透則與中門內穴通已爲巨石隔斷遂北透度二  
隘仰其上卽橫板上渡處再北塢隘且窮遂從橫板竅攀空  
上仍北下木梯直東入又踰一隘有岐亦南去從之漸見前  
竅流光燿燿已透山得後門矣行數丈抵後門門東南向下  
瞰平疇山麓溪一支環而北透其腋前復有石山遶爲塢別  
成一洞天仍北返分岐處東直入數丈遇巨石中踞由北隙  
側身入一智井憑空下陷大三四丈深如之懸梯投炬令一  
人垂索下兩人從上援索以繫梯其人既下余隨之東南入  
一竅中復有下墜穴極深隘一飛鼠驚竄上從其西南攀崖

上崖內亦智井空陷燭之不見底循其上西南入穴窮乃依  
故徑直西出前門南門在北洞南二百步山腋間俗謂之  
雙門洞東向入輒橫裂分南北南向忽明透山腹數丈出後  
門亦後洞最南者北向內分兩岐一北一東北余先從直北  
者透腋平入下伏深窞循其上若履棧道數丈北抵透明處  
中門西闕在五丈下此則中門上層也前列柱垂樞飛崖下  
懸與下洞相隔隙間俯窺下洞洞前明敞不啻堂皇也上層  
踰隘北轉昏黑不能入乃出南門索炬於北巖復入至分岐  
東北處踰石垣下內寬宏窈窕數轉約二十丈透出東門則  
後洞中門也門內五丈有岐東南去轉西南不十丈輒窮

中門在南門北數十步與南門祗隔一崖上下懸絕叢箐翳之須下而復上搜剔久之乃得門秉炬東入其後壁頂卽南來上層也從其下入峽峽窮攀而上南卽上層北轉處向所瞰昏黑不能下者今援側坂可通焉東直進又五六丈穿穴下爲大石所窒塞卽北洞交通中斷處也大抵北洞後通之門一南洞後通之門二中洞則南通南洞上層北通北洞與窟是山東西南三面皆透達無碍惟北山不通而頂有蚺蛇洞另闢一境云 蚺蛇洞在龍隱山北絕頂遵山東北麓一里溪水從兩山峽中破壁西北來激空倒影自成一壑渡水其一里攀崖南上兩崖如削瓜突石纍纍緣之躋佳木叢藤

蒙密搖颺上一里洞門穹然北向正與郡城對前有土山障溪西北去環麓成塢門之中石柱玲瓏疊綴前浮一臺東闢洞空朗多外透竇東崖窮南轉始窅黑須炬入數丈無復旁竅乃出仰眺東崖上復有重龕攀崖上躋則外龕甚巨內龕重綴其上坐內龕前對外龕北竇一圓恰當其中照若明鏡盧僧洞在龍隱北洞旁北數十步卽是門亦西向最隘中闢一室東北攀隙上又得一小室其東北與垂蓋上懸下聳圓笋若人之首卽指以爲盧僧者也 九龍潭在郡城西南五里平岡上有潭一泓深杳無底水常溢流成溪九龍洞石山在其南山北有巖北向前立石屏由西隙入內闢巨室不

甚高後復有石柱一圍當洞之中秉炬南入又得一室南漸隘乃出巖西下又有一南入峽甚深隘秉炬入深十餘丈而止底多石丸色黃不及向武瑩白東下又一覆壁橫拓平廣去巖東北四里石陣排列自西而東如插屏直止於香山寺前俗稱爲鐵索繫孤舟云又一里返香山寺寺僧謂九龍洞甚深須易數炬此洞乃丹霞墓非九龍巖也 會仙山在龍江北南面正臨郡城渡江半里卽抵麓山盤崖峻疊東西南俱無可上惟北山腋裁受級道從西麓北向行抵山西北隅乃東躋第一層南岐爲百子巖第二層南岐爲雪花洞岐而北爲百丈深井巖直東上嶺脊南轉爲絕頂此會仙西北面勝也東麓北向上者直抵絕壁下最東北隅爲丹流閣西循崖爲東觀以漸次西爲白龍洞爲中觀爲西觀此會仙南東面勝也 百子巖在會仙山西崖半門西向入下門三丈餘梯空上上復疊爲洞前門復出下門上洞雖不邃峻而是山石質皆青黝洞石獨赭南又一洞與上洞並復青石爲異雪花洞在會仙山西崖乃百子上絕頂側洞西北向前結菴奉大士菴後秉炬入門少隘漸進乃崇拓皆石柱石門宛轉數曲內復狹下石始嶽崎不復平砥越一小潭南轉境遂窮夜宿洞側臺巔三面斗臨絕壑灑氣上接冲穆萬象 絕頂中懸霄漢江流如帶橫於下東界青烏山西界天門拜相山



俱自北而南左右翼對宜山則近伏西腋以其卑小宜民則此山巖巖壓眾可知矣峰頂有元帝殿頗巨無棲者深井在絕頂北平雪花洞列道由二天門東北行忽山頂中陷下週圍大數十丈深且百丈四面皆嶄削下嵌密樹古藤垂結相虧蔽俯不見底獨南面石崖自山頂直剖下下有洞北向高穹上及崖半中特平遠反可歆矚以洞崖削無片隙樹皆莫能緣也崖西北峰頭橫突石窻中踞之正對洞門旁又有一棋枰石可憩余晚停杖雪花洞至橫突石上心目俱動僧謂洞直通山南穿江底出南山恐未必然也中觀在會仙山南崖下緣石坡上至此則危崖側立洞南向洞東三百步

得白龍巖

白龍巖在中觀東危崖下洞南向入門卽西行

秉炬漸轉西北入愈崇放二十丈內石柱中懸撐洞頂殊極偉麗後有巨石中亘四旁愈擴穿隙入石柱益繁立北數丈度隘又數丈石壁忽湧起如蓮下垂下絕無旁竇上復深昧去平地三四丈不得級乃出至懸柱處又東上一岐入數丈石柱夾而成門踰門東下漸北轉恐火炬不給未竟而返東觀在白龍洞東北二百步穹巖覆空門南向西復有東向洞崇峻崆峒西入數丈忽深坑下墜上嵌危石北轉益宏深蓋下陷窟透石北轉於下洞上穹亦凌石北轉中皆欹嵌石橫跨側偃彼此間阻故無深入道第一望窅黑而已是洞乃

自龍後洞前洞東岐未竟處可通此出云 丹流閣在東觀  
東北二百步危崖至此又一折矣閣西有洞門東向甚高洞  
西入亦數十丈卽隘無深入處閣北崖嶺頓墜北路遂盡此  
西觀在中觀西三百步危崖上下皆石壁懸亘後有洞  
亦南向余至中觀仰眺不見洞遂東折既下山麓迴睇見之  
不及復往矣聞會仙山西南層崖上又有仙姑巖由西南山  
麓攀躋上當在西觀上層雪花百子巖南崖無正道也 多  
靈山最高聳其山四時皆春瑤花仙果不絕於樹登其巔四  
望無與障者山在慶遠西南九十里永順司鄧宗勝之境乃  
龍江西南都泥江東北二江中分脊處也

予以二月十七抵慶遠郡稅駕香山寺日方午乃抵南山遊  
龍隱雙門洞諸勝卽宿龍隱菴

十八日由山北登蚌蛇洞既下循南山北西行二里半穿山  
腋南出循山南又西一里半過龍潭又西一里渡龍潭北出  
小溪南入丹霞墓洞遂渡龍江北循會仙巖西麓東上山共  
三里遊雪花洞又一里登絕頂下宿雪花洞

十九日探深井巖從雪花東坳下游百子巖下山二里至卧  
雲閣攜火遊中觀東觀丹流閣白龍洞下午還香山寺

二十日至二十五日日日坐雨寺中

二十六日早晴同僧慧菴往九龍西南五里越北流溪繞丹

霞墓洞東麓南三百步迴眺丹霞墓山峰頂有東向巖玲瓏  
幻極無可登道又東南三百步抵東峰北麓路旁皆水坑流  
貫路行其上若橋西有巨楓樹一株下爲九龍祠九龍潭在  
祠南石崖下水從中北向經路旁水坑出丹霞墓洞前平岡  
潭乃下其流也九龍洞山在郡城西南五里丹霞墓東南山  
從丹霞墓山後繞而東其北崖有洞下卽深潭嵌石壁中一  
石中橫東西界潭爲二西潭南石壁高數丈下插潭底潭多  
巨魚然水際無穴穴深入通流處當沉伏水脚洞高懸潭上  
三丈餘門北向頗隘入乃高穹峽南進秉炬直入十餘丈東  
轉下雖平石級屈曲湧起中環停滯成仙田東二丈忽深坑

下陷由坑上南崖偃僂出坑之東下平仙田每每如西但其  
上覆石壓乳人不能舉首僅披隙透稍南北分岐逼仄愈難  
入仍西出坑崖上投炬諦視坑中下深三丈餘復開洞東西  
透西洞直入與上峽等東洞則橫拓空闊坑南崖平覆如棧  
惟北則自上直插坑底坑裂竅南北闊二丈東西長三丈洞  
頂懸柱倒蓮恰下貫坑中色瑩潔逾衆乳俯窺久之恨無梯  
索得竟粵底也東三百步又有巖北向深十餘丈在東峰崖  
過脊處其九龍西峰高懸洞在丹霞墓山之東頂無路上重  
崖綴石逆攀雖險然石鏗競裂似可援手以發足乃凌空上  
躍者數層從其北得一巖門東向前隘峻極中通一線可尺

許曲折入三丈內忽穹開西南轉遂黑暗中又轉入一小室  
隙似無餘乃出然非高懸洞也高懸洞尙在南畔絕崖上虧  
蔽不能仰見稍下轉崖脚攀隙以升巖亦東向然東門環迴  
前列高十丈覆空若垂天之雲內壁後層削起上嵌赭石一  
區尤靈幻連開二門纍纍上齊雲氣惜無十丈梯凌空上也  
下山五里返香山寺

二十七日渡北門大江登北岸觀音閣前爲澄碧菴皆江涯  
危石飛突洪流就之結廬者又北一里過雪花洞下又三里  
循西山轉入西塢北界皆石峰崔嵬南則土山間之中有土  
岡南北屬踰岡西下三門巖在北崖之中乃北抵山下拾級

上先抵巖東則石隙縱橫駢沓皆可深入前有徑循崖端而  
西其巖中闢高二丈五尺深如之橫拓四丈餘外列三石界  
門爲四俱南向惟中門最巨東腋一門頗卑伏稱三門者舉  
其大也西門崖壁莫能前其上石態更奇東門穿隙出卽與  
東偏縱橫隙並出巖東披縱橫隙亦宛轉三四丈始闢而大  
踰闕東上前穴通明另成一境乃巖外奧室也透前穴出石  
高擎穴前平齊臺東又有宛轉小隙瓣萼連簇紛披無不畢  
達由臺前小隙下卽前循崖端而西徑復從崖端東轉石山  
嘴稍入有洞內闕亦南向深數丈致幽美乃出舊道東近三  
百步北望山坳間巖高懸絕峽上輒北向攀崖以登東入巖

巖前皆棕竹翳峽中洞當轉峽側上下懸峭門西南向入五六丈遙望西南銳峰一線直上列洞前洞兩旁石壁廉利沓合洞後透石門入凡三闌三合中連下透俱若浮橋架空思躋其上竟不得受踵處及已穿出三橋中轉寬黑從左壁摸索上攀東崖南出三四丈凌內梁之東梁背刀削起趾不得着梁西亦峻石柱頂隔別不容西度又南緣東崖凌中梁不可度如前益南凌前崖之東梁背平整架兩崖間又圓石尺許聳立上遂平行西度梁北轉入峽門卽內二梁西端石所界成者峽內東豁卽下通梁後西剝又透入一穴中皆爲龕爲門爲峽細沙鋪底平潔如玉但暗束不能窮深卽返至前

梁西崖半攀石筍南下穿石窟出抵洞中央矣出洞取棕竹數枝束可百步一洞裂削崖間如丁字上橫下豎門南向乃北抵崖下石峽間纍數巨石上最上一石高削數丈無級下有斗大穴蛇穿以入中遂穹然上高數十丈外透起則丁字豎裂也洞內夾壁入底傾下北進七八丈東折遂昏昧不可詰出洞下纍石循崖東數十步又入巨峽門亦南向北進五六丈東折入黑暗中忽有光如星在履底近索之復不見益東二三丈石板盡處復熒熒微光動就視之一外界石如屏中細孔僅寸屈曲透漏不一下亦有斗大穴可墜乃懸手下抵下層外亦開門南向門內距石屏僅二丈屏下又橫竅內

通卽前所望履底有光處門外循崖東數丈又得一南向巖內不深折後壁特石竅玲透巖前崖磴懸絕不能東仍西歷前所入洞口下至山麓東百步又一洞南向當北麓穿入之則東轉透峽五六丈出門又東豁者也聞古城洞在青烏山前東門渡江三里可至石壁對夾中多種蔬者時日已暮恐渡舟晚不及濟返由故道渡龍江抵香山寺街鼓發矣

二十八日爲多靈山遊西南十五里踰上嶺復與石山遇又三里南穿其峽西循石峰南麓行二里爲黃窰邨邨西石峰前突曰黃窰山西二十里南渡下遷江其七里出土山隘於是塢遂南北豁東西兩界皆石山中有溪北流去南湖流三

里宿黃邨道人茅中

二十九日黃邨南三里峰廻塢夾藤蘿虧蔽山窮水盡處蒙密中不知水從何出但聞潺潺有聲來自足底耳從此躡級西上踰坳共一里抵都田隘溪自西南來抵坳窟下穿穴東出卽黃邨上流也南八里登大歇嶺始見多靈三峰如筆架高懸西南二十里外下嶺又三里西由塢中入石山峽漸轉西北行爲永順境地窅絕無人居石峰離立色青白成紋態鬱紆若鏤刻五里路右二巖駢啟門皆南向東洞在麓可穿竅東出西洞須攀石始達門後透腋北入凌竇隙以上轉南出已在洞門上層矣下石板砥平薄逾葉踐之聲逢逢南有

穴下俯洞門猶層樓通牖但自外望不覺上洞中虛也結構絕似會仙百子巖勝當十倍之南下山西北二里北山麓石崖下覆橫亘如行廊南一里路漸降北望石峰頂巖穹然東南向內微透明穴乃石梁飛架峰頭者下至壑足南轉始與溪遇凡兩渡此溪南五里直抵多靈北麓路左一土山自多靈夭矯下墜從其南前轉西南行一里下土山渡溪其溪自南來乃多靈以西石山邨以東夾成之者抵石山邨東北山環壑盡搗入石穴過溪北抵山麓是爲石山邨乃飯一老人家望多靈正當其南問其上有廬無居者遂借鍋於老人老人攜火曳杖前導仍渡溪東南上土山共二里越岡得塢與

多靈接阪老人指余山登道別去始踐土麓東南上轉東北行二里遇土峽最峻攀之上抵石崖下崖峭立叢木中得石磴忽聞犬聲以爲絕巘幸有人久之不見但竹捆駢置道旁蓋他邨竊竹者聞人至避去耳於是攀磴上磴爲墮葉覆積幾不得級磴旁壽枋大至三人抱者甚衆上一里得坪菴倚之北向竹匡木几灑掃具悉給二桶尙存斗米而苔封古竈人去已久菴側斷積薪竹炊具甚贍而水不可得菴兩旁俱無汲水道惟東北路倚草樹伏循崖甚遠余從之半里果得泉蓋山頂皆懸崖綴石獨此腋衆木合翳水自崖石墜溜不絕昔人鑿痕接竹引之以通流供酌乃攜水返菴令從人漸

米炊余西南入叢箨中覓登頂道初小有路痕乃竊筍者所踐竹盡上皆巨茅沒髻頂披之不開隙里許踰一西走脊脊西又旁起一峰下不能見至是始陟之循脊東上又一里踰一南走脊脊南亦旁起一峰此兩峰卽大歇嶺所望合中峰爲筆架者於是又循脊北上石崖峻垂攀石隙乃得移步直北上一里凌絕頂頂孤懸眾石山上南北逾一丈東西五丈惟南面可躋餘三面皆嵌空不受趾頂之北有崖自頂平剖直墜至菴前石磴下巨木叢列翳不可窺惟遙望四圍重峰矗矗盛列南壑下層坑隔坂時見有水汪洋蓋都泥一曲也土人謂此山四時皆春花果佳珍林無素木然但可採食懷之輒復迷道若余所見者引泉覆石之上有葉如秋海棠大倍之花如秋海棠者色獨白不知何種山頂巨木皆薔薇綠枝綴花殷紅鮮耀又有酸草莖大逾指正赤作珊瑚色眺望久之仍由故道返菴餐所炊粥積薪佛座前爲長明燈乃架匡展簞卧

三月初一日晨至石山邨覓勝後山仰見石崖最高處洞門穹懸依小徑抵西峽以爲將攀崖上躋顧乃穿腋下北踰隘東峰峭立西崖多懸竅然蘿蔓叢沓無可躋北隨峽出又通別塢不能窮仍轉出邨前東索溪水所由入則洞穴伏山坳下門南向溪流瀉入之洞高闊各二丈深四丈水至後壁旁



分二門入昏黑莫可進洞前石柱當其右穿柱入下有石坡尺許傍流渡入不煩涉水柱內西登隙上復闕一龕底平上穹亦石柱前列與水洞並向出洞還飯老人家東北抵黃邨巷前道人瀹茶煑笋以待乃取所摘多靈山頂茶芽潔釜焙之當吾鄉陽羨最佳茗香色都無下意

初二日別道人北渡下遷江東上高四山南阪踰兩土岡下塢有塘一方瀦水甚清西北石峰下破澗去叢木翳之甚遙又東踰岡巨塘滙陂間北墜下分爲兩流一北入山穴一東循山嘴環流黃窰邨前抵邨詢觀巖道道須東經草峽北出峽口西轉循山之陰可得巖從之遂東甫出邨北望崖壁半

穹開洞門東向高迴不及攀二里半北入草峽又東北一里踰石脊西轉卽黃窰諸峰石山之陰也山排列西北去北盡於獨山而觀巖在其中循山東麓西北行凡三里西南折至其下則危崖上覆下有深潭水瀦其中不見所出惟從巖北隅瀉入巨門中窅黑水聲甚沸蓋水自山南來溢底出瀦爲此潭卽黃窰西巨塘分流入山穴者也乃一出輒復北入穴尤異覆巖之上垂柱懸旌紛紜亂後壁石脚直逆插潭中上迴旋龕竇嵌漏不一俱隔潭不能至潭東北崖間神祠倚之祠後卽潭水北入石門處門南向甚高中望崆峒疑浮筏可進從神祠東北出平疇有北趨道欲從之入郡旣乃愈北

始知獨山懷遠道也忽見西山下潭淵然直逼石崖崖南開穴則前北向入門水又透此出也計所穿山腹中亦不甚遙若溯流入當可抵水聲甚沸處乃東轉半里前潭水散爲平溪灤邨南東去又東北八里得入郡大道又五里路兩旁多智井墜穴與太平一轍於是聞水聲淙淙石壑或斷或連水走其底俯瞰底水所墜不一道皆不甚巨東二里踰岡下水走石壑底復如前又三里抵香山寺宿焉是後余欲西由南丹州入黔日候騎郡中至初九日卒不得騎遂決意步行初十日晨飯香山寺別慧菴西取南丹道去二十里有山中峙兩界石山間曰獨山尖峭孤聳亦獨秀流亞又西北十里

泉一泓止石窻中色澄碧西一巖北向前大石屏峙門洞深五丈後壁皆若蓮花葉蕊層綴二里爲大峒堡大洞在南山背堡後南入峽尙三四里始至洞一曰天門洞云自堡北望之南峰迴環如玦入至堡後又類蓮瓣自裂可披隙進也過堡十里江流自南而北江闊半慶遠乃懷遠鎮南江也江自荔波縣來至河池州東境爲金城江又南合思恩縣東江南抵永順司北境入山穴中暗伏屈曲數里東出於泰順里又東北過此遂北與北江合爲龍江焉渡江西岸卽爲懷遠鎮鎮北有北江自思恩縣總州來舟溯南江至懷遠止北江通小舟可四日直達總州

十一日西北四十五里抵德勝鎮

十二日由鎮北抵北山下半里過觀音菴菴左一洞南向倚山椒高五丈後有巨柱中屏穿東西隙俱可入乃束炬從東隙北進數丈洞遂高拓多擎天柱諸詭勝東折數丈北面光熠熠自上倒影以爲從此出洞也及東去尙有道更張炬覓之又五丈止仍北出望明光趨之則懸石巉岨光上透如衆月並升余將攀石登企忽平峽繞其左而轉遂透出一北向門又在前所望通明下也出洞攀叢崖南躋石萼攢沓正過通明上穴南向凌山頂登玉皇閣稍憇下山折磴石崖間凡數曲下出過前洞南去德勝又半里 韋家山從山西麓攀

級登崖懸峽轉樹倒垂其上類若乘空上有別柯從巖門橫架巨樹杪合爲一橫架處枝體穿漏刻空穴竅工奪雕鏤巖門在上下削崖間門西向前對樹杪就隘爲門門旁卽觀音閣閣左右皆可入洞不十丈輒止大約以凭虛勝無中通奇竇也北返德勝鎮西二里岐而南渡一小溪平原中亂石叢簇分裂不一中瀦水一泓澄無片草石頂各跨樹盤絡如香山寺石片更稠合間以潭渚尤奇潭西一石峽下與潭通南一石獨高巨僧結茅於上曰蓮花菴門就石隙東西北俱小流環之地較香山幽麗特絕仍北出大道又一里入河池所十四日爲北山遊出所城北門行平壑不半里亂石秀立路

隅爲門爲標爲屏爲梁爲芝爲笋竒美博出倍巧於蓮花菴香山寺者又北向陟山危磴倚雲崖曲折上一里抵菴菴之西凌削崖去上下皆絕壁菴無他竒惟臨深凭遠升眺清曠耳下山至所城東北入壽山寺亂石一區水縱橫滙其中石巔構廬三四處高下散布西度橋遇側石一隊亦南北列上下有穴如門穿而西一巷北向前滙爲塘石所擁成者菴後聳石獨高憩久之返所城

十五日西南二十三里宿於馬草塘北邨

十六日西南五里一江自北而南深嵌危崖間所謂東江也西渡江江闊數丈深不測再南下數里卽與金城江合人石

穴中云西十五里又一江自北而南闊十丈深與東江並乃自荔波來者是爲金城渡渡北西岸有水懸崖平瀉三丈聲轟如雷東注大江則官邨南來水也渡江西十四里宿鬼巖邨

十七日西北三十三里抵河池州

十八日西十六里爲南丹境又三十里宿巖田邨

十九日西十里水自東北注西南深不及膝闊五丈是爲大江源發西北山壑中南流東轉至永順界合東江下流者也渡江又十里至金邨其地西往錫坑止十五里西北去南丹州五十里

二十日西北三里塢底小水自南而北大道南隨之錫坑道也從之北二里遂轉為東西塢大溪自西來即南出為大江者於是西湖大溪二十五里為大徐邨又溯流四里抵西山下北轉一里涉水上西山望北塢山環壑盡瀑流從山腋乘空下高及千尺粵西皆石山林立故懸水最艱今於僻壤得觀此亦汗漫中一奇觀也西上一里瞻顧不能釋又十三里稅駕南丹州逆旅 南丹西三日程抵巴鷺西即泗城州界銀錫二廠在南丹東南四十里其廠有三曰新州屬南丹曰高峰屬河池州曰中坑屬那地州三地相間僅一二里由廠南兩日程至涯洞有大江自西而東為那地東蘭二州界其

渡處名河水渡圍都泥江也上流來自泗城界下流東歷永順土司北五里下石堰為羅木渡

二十四日候夫南丹者數日始行西北四里石峰復出湖峽西入三里一石中立山峽高銳殊絕兩旁危嶂隘夾益覺崢嶸又三里西出夾山關數家倚北峰下後削崖如屏前接新篁密箐路行峰竹中忽北山麓石崖飛架小水西來直漱崖足北入石洞中洞南向在架石東危崖下又西北二十里止蠟北邨

二十五日北竟邨峒四里有洞在西小山坑中門東南向外甚做中壁屏立又闕內門沉沉不可測路由東山上隔塢行

對望之藤蘿掩蔽中有水潺潺出洞門成澗南流去又西北  
二十七里抵飄緲邨

二十六日西六里北轉山開東西兩界東界山自東突西凡  
五六峰西面悉平剖下墜排列而北若五老西向澗由中北  
向去北六里東界突山既盡塢大開東望一尖峰迴立中空  
如合掌懸架眾峰間空明下透合處僅湊徒杠千尺白雲正  
東映危峰脇可借名香爐瀑雪不復辨為山為雲也自桂林  
來所見穿山甚眾雖高下各奮若此剡空出雲者得未曾有  
又北十二里抵銀邨

程曰羅猴為泗城東北境都泥上流所經也邕歹北五里至  
山界與貴州下司分界處粵西西北境止此余粵西遊亦止  
此

裔孫 熙海南校字

遊記第四冊上終

遊記第四册下

江陰徐宏祖霞客著

子 寄介立輯

同邑 季夢良會明編

後學朱咸慶映葭

揚名時凝齋閱

族孫徐 鎮筠峪 重校

黔遊日記一

戊寅三月二十七日自南丹北鄙肥歹邨易騎入重山中漸履  
 無人之境五里逾山界嶺南丹下 司界又北一里逾石隘是為艱  
 坪嶺其石極嵯峨其樹極蒙密其路極崎嶇黔粵之界以此  
 而分南北之水亦由此而別然其水亦俱下都泥則石隘之  
 脊乃自東而西度盡於巴鷺之境而多靈大脊猶在其東也

北下一里就峽西行一里始有田塍又半里峽轉北塢始大  
開又北一里有邨在西塢中曰由彝此中諸塢四面皆高不  
知水從何出然由彝邨南石壁下有洞東向細流自畦中淙  
淙入透山西而去固知大脊猶在東也至此南丹差騎辭去  
由彝人始許夫騎久及不至促久之止以二夫負擔去余獨  
坐其欄從午至暮始得騎西北二里至山寨則寨人已送擔  
亦前去乃由其東上嶺越脊北下一里行壑中又北一里再  
越嶺脊下行峽中壑圓而峽長南北向皆有脊中亘無洩水  
之隙而北亘之脊石齒如鋸橫鋒豎鏑莫可投足時已昏暮  
躍馬而下此騎真堪托死生也越脊直墜峽底逾所上數倍

始知前之圓壑長峽猶在半山也峽底有流從南脊下隘遂  
涓涓成流隨之西向行共里許有邨在南山麓擔夫已換去  
又騎而西半里擔夫又已去蓋邨人恐余止其家故亟換之  
行而又無騎換騎夫不肯前余強之暗行西北半里有溪自  
東而西橫堰其中左右淵深由堰上北度馬蹄得得險甚又  
西轉過一邨半里由邨西而北向逾嶺始與雙擔同行暗中  
呼聲相屬不辨其爲石爲影也其二上二下遂行田塍間共  
五里過一寨排門入居人頗盛半里復排一門出又行田塍  
中一里半叩門人舊司門以內茅舍俱閉莫爲啟久之守一  
啟戶者無茅無飯而卧上下二司者卽豐寧司也瀕南界



者分爲下司與南丹接壤二司皆楊姓兄弟也而不相睦今  
上司爲楊袖強而有制道路開治盜賊屏息下司爲楊國賢  
地亂不能轄民皆標掠三里之內靡非賊窟其東有七榜之  
地地寬而渥鴛鴦尤甚其叔楊雲道聚衆其中爲亂首人莫  
敢入 舊司者下司昔日司治也爲上司所破國賢移居寨  
上寨在南山麓與舊司南北相對中隔一塢然亦無奇險也  
二十八日平明起雨霏霏下余令隨夫以鹽易米而炊余以  
刺索夫於南寨國賢避不出托言與上司不合不敢發夫止  
許護送者兩三人送出境余飯而待之送者亦不至乃雇夫  
分肩行李從舊司北向逾嶺行共三里餘下至餓鬼橋有小

水自東北注西南小石梁跨其上禦人者每每橫行於此又  
北二里逾嶺已爲上司界下嶺二里有邨在西塢而路東有  
楓木樹對之又東北逾嶺二里有邨在東塢其前環山爲壑  
中窪爲田邨倚東峰有石崖當邨後路循西嶺與邨隔壟相  
向始敢對之息肩又西北逾嶺二里轉而西向行於是峽大  
開南北相向南山下邨居甚稠北山則大路倚之西行五里  
路復西北逾嶺蓋此地大山在東北路俱緣其西南上雖有  
升降然俱上多下少逶迤以升者也又西北二里逾嶺路北  
有峰迴亘層疊儼若天盤龍髻崖半有洞門西向數十家倚  
之路乃北轉又一里越其西岡北向下西岡者大山分支西

突爲盤髻峰其下橫岡西度者也西岡之北山又東西排闥  
北望西界山一圓石高插峰頭矗然倚天之柱其北石崖剝  
沓卽上司治所托也東界土山卽路所循而行者其北五里  
路與西界蠹柱對又北二里忽山雨大至擔夫停擔各牽笠  
蔽雨余持傘亦蔽一挑忽有四人持鏢負弩懸劍囊矢自後  
奔突而至兩人趨余傘下一人趨顧僕傘下一人趨擔夫笠  
下皆勇壯兇獍似避雨又似夾持余甚恐問余何往余對以  
都勻問余求煙余對以不用久之雨不止而勢少殺余曰可  
行矣其人亦曰可去余以爲將同往而前者乃余行而彼復  
止余益知其必非良人然入其吻而不下咽其心猶良也更

北半里轉而西又一里餘有營當兩界夾中阜上壁壘新整

由其下又西一里入上司南門有土垣環遶門內卽宿鋪江西

人自下司至此居舍中各半土半欄時雨過街溼余乘溼履遂由街北轉而西

有巨塘滙其內西築堤爲堰發爲馳道甚整又北半里直抵  
國山東麓北向入一門有石罅一縷在東麓下當其盡處鑿  
孔如盂深尺許可貯水一斗國上下人俱以盃候而酌之謂  
其水甘冽迥異他水余酌而嘗之果不虛也由此循國麓轉  
入北峽峽中居人甚多皆頭目之爲心膂寄者又編竹架圍  
於峽中分行貯粟焉由北峽西向行已入國後有脊自西北  
連屬於國乃國之結蒂處也脊東峽中有洞倚國麓其門北

向甚隘而深有二人將上圍余問此洞深否云其洞不深上至圍半有大洞頗深而有水須以炬入由下仰眺圍上居舍纍纍惟司官所居三四層皆以瓦覆以堊飾圍險而居整反出南丹上也余乃隨其人拾級上圍其級甚峻而螿鑿開整竭蹶而上共半里折而東有樓三楹跨路間乃圍半之隘關也洞在中楹之後前爲樓所蔽不可見有男婦各一炊中楹下二人指余入登圍去余索炬於炊者則楹後卽猪欄馬棧踐之下洞洞門北向窪墜而上下皆汚土上多滴瀝不堪駐足乃復出而下先是令一夫隨行至脊下不敢登余乃獨上然圍上之形可以外瞭而見惟此洞爲樓掩非身至不知也

仍由舊路里餘返宿舍則已薄暮矣炊飯亦熟遂浪而卧

上司土官楊柚由長官而加副總以水西之役也其地小而

與南丹爲仇互相襲殺故兩土官各退居圍上南丹州治在圍下而居於

上上司則司治俱在上而環圍而居者皆其頭目也南丹第三弟走荔波爲莫俛所執

第四弟走上司至今爲外難日惴惴焉其圍圓而大四面

絕壁惟西北有脊通級而上路必環旋於下峽故爲天險峽

中水西南下合塘中及外峽東北諸流俱透西南腋中墜去

二十九日由上司出南門仍渡門東小水溯之東北行一里

躡土山而上四里逾土山西度之脊其西石峰突兀至此北

盡逾脊西北行一里半嶺頭石脊復夾成隘門兩旁石骨嶙

由隘西出轉而東北下半里下抵塢中又北一里復越土  
山西下脊是爲上司獨山州界於是下嶺循東山行又二里  
有邨在西山塢中爲苴查邨其處東西兩界皆土山中開大  
塢有水自北來界於塢中遶苴查之東乃西向破峽去循東  
界山溯水北向行又三里水分二支來一自西北一自東北  
如了字會於中支山盡處西北者較大路溯東北行一里半  
始渡之於中支山東麓得罈子窰邨乃土官蒙氏之族也邨  
北溪中皆碎石時涸時溢又東渡之東北上岡頭共里許有  
土環遺址名曰關上而無居舍又東北一里水盡塢窮於是  
躡嶺其嶺甚峻三里北逾其脊隘中底石如鋪兩旁有旣立

峰是名雞公關其脈自獨山州西北繞州治東南過此又東  
南度六寨之東而下蠻王峰者也脊西南水下苴查而入都  
泥脊東北水由合江州下荔波而入龍江從脊東北眺則崇  
山蜿蜒列屏於前與此山遙對成兩界中夾大塢自西北向  
東南焉下山卽轉北行一里抵塢轉東卽有小水東南下又  
東一里逾陟岡阜忽有溪自西北注東南水於此復出爲龍  
江上流矣渡溪東上於是升陟坡壠東北行塢中五里有數  
家之邨在東北山下從其前後轉入西峽北一里過一脊始  
北向下嶺其下甚深半里抵其麓始知前所行俱在山上也  
又北行塢中一里半有大溪汪然自西峽層山中出東注而

去亦山合江州而下荔波思恩者歷石壑而渡其北又緣西  
界支隴北行五里為羊角寨

乃蒙氏之砦也 在西山麓

又北三里有小水

自西坡東注涉之又北二里入獨山州之南隘門其州無城

一土知州一明知州土官蒙姓所屬皆土人

即苗仲

明官多缺

以經歷署篆所屬皆客戶余所主者江西南昌人黃南溪也

其人忠厚長者家有樓可棲蓋是州雖無城而夾街樓房連

屬俱用瓦蓋無復茅欄牛圈之陋矣 獨山土官昔為蒙詔

四年前觀燈為其子所弑母趨救亦弑之乃托言殺一頭目

悞傷其父竟無問者今現為土官可恨也

三十日平明飯出獨山州北隘門西北向循西界山行六里

有小水亦自西坡東注涉之又北二里北塢漸窮山脊自東

界西度南轉乃路轉東北澗中小水北流渡澗循東界山腋

間東北上又二里有水溢路旁石穴間甚冽

其側有蒙氏修路碑

從此攀石磴東北上嶺兩大至一里半北登嶺隘是嶺由東南度

西北乃祖山從其東北分裂眾枝其直東而去者為黎平平

崖之脊東南分枝而下者為荔波羅城之派西北分枝而下

者度此稍北即西轉南走而環於獨山之西度雞公嶺而南

為蠻王多靈之派

獨山州南二十里有山尖起立於眾山之中是名獨山州之所以得名也

又東

北行山峽間乃下其二里有澗自東谷走深崖中兩崖石壁

甚逼澗嵌其間甚深架石梁其上為深河橋過橋復躋崖而

上登嶺而北有小水自東北瀉石崖而下涉之復升嶺共一里遂由峽中北行又二里乃下東北行壑中有邨在東山下由其前少轉西北共二里有溪自東北來渡之溯其西岸東北逾嶺二里一水自東北來一水自西北來東北者較大於是涉西北水緣中支山而上東北三里而登其岡飯於岡上乃稍下又北逾嶺而下夾塢中共三里又上有溪自南峽北向下墜深潭中潭小而高此西北小溪之源也又北逾嶺下一里半下度深壑中有澗自西南峽中來至此東向西轉此東北小溪之源也涉之西南登嶺半里而上循嶺半西南行二里過兔場西出嘉坑關隨小水西下由夾中行五里兩夾

山多石崖突兀路側有泉湧穴出又西二里水墜南峽去路逾北坳上有寨在東岡之巔由其西北度脊南北俱有窪中墜環塍爲田直抵其底水皆自底西向透石穴者也又西逾嶺一里出隘口其上石骨稜峭皆作噓雲裂萼之勢又西北下峽中一里轉而西半里西出峽是爲獨山州與胡家司分界胡家司卽都勻長官司於是山開南北洋中有大溪自北而南是爲橫梁循溪東轉南半里抵南崖崖下有賣粉爲餉者以鹽少許易而浪之隨溪南岸西行道路開整不復以蜀道爲苦溪北有崇廟在高樹間人家田隴屢屢從斷岸而出共六里過塢裏邨又西一里其水南曲乃西渡之從溪西岸南行半里

爲耶母邨由邨前西轉塢復東西開而其邨重綴岡阜瓦舍  
高聳想亦胡家司之族目也西二里其水北曲復西渡之又  
西北一里其水西曲又北渡之從北岸懸崖西行一里半有  
水自西來會乃麥冲河也卽溯河西行二里入麥冲堡南隘  
門而宿是晚雷雨大作徹夜不止

四月初一日平明起雨漸止飯間聞其西有桃源洞相去五  
里須秉炬深入中多幡蓋纓絡之物覓主人導之不得曰第  
往關上可西往也遂北向出隘門溯溪東岸行忽石壁湧起  
岸東勢極危削溪漱之南路溯之北咫尺間上倚穹崖下循  
迅派神骨俱竦三里轉入東塢其北有小峰立路隅當麥冲

河南下之衝有巖北向曰觀音洞又北半里曰麥冲關問所  
謂桃源洞者正在其直西大峰之半相望不出四里外關之  
東有眞武閣南向正與觀音洞門對乃停行李於閣中覓火  
炬於僧將往探之途遇一老者曰此洞相去不遠但溪水方  
漲湍急不可渡雖有導者不能爲力而况漫試乎余乃廢然  
而返取行李西南越而下抵河東岸溯之北共一里有溪自  
西北山腋來路從東北山腋上遂與麥冲河別當坡路潦跡  
間有泉汎汎從下溢起孔大如指以指探之皆沙土隨指而  
溷指去而復溢成孔乃氣機所動而水隨之非有定穴也一  
里轉上後峽遂向東入又一里峽更東去路復從北峽上其

處石峰嶙峋度脊甚隘越隘北下塢中被壟盈塢小麥青青  
 蕎麥熟粉花翠浪從此遂不作粵西蕪態粵西獨不藝麥脊東西亂  
 水交流猶俱下麥冲者又東一里轉而北有塢南北開洋其  
 底甚平犁而為田此處已用牛耕不若六寨以南之用槩耨矣波耕水耨盈盈其  
 間水皆從崖坡瀉下而不見有澮濬之跡二里有邨頗盛倚  
 西峰下曰普林堡又北一里逾嶺而上石峰復度峽而下轉  
 而東平行石嶺間一里東下盤窩中有小石峰圓如卓盤托  
 而出路從之經窩東入峽一里復北向升嶺一里遂逾土脊  
 之上此脊當為老龍之幹西自大小平伐來東過谷蒙包陽  
 之間又東過此東南抵獨山州北又東為黎平平崖之脊而

東抵興安南轉分水龍王廟者也越脊北下峽壁甚隘一里  
 下行峽中有水透西南峽來入北隨峽去渡之傍澗西涯行  
 有岐路溯水西南峽則包陽道通平浪平洲六洞者也隨水  
 東北行峽中又三里轉而東其峽漸開有邨在南山間曰下  
 石堡又北二里過一巨石橋澗從橋下西北墜深峽中而去  
 路別之東北逾嶺北降二重又二里越嶺下則東南山塢大  
 開大溪自西北破峽出湯湯東去是曰大馬尾河以暴漲難  
 渡由溪南循山崖東行溪流直搗崖足一里東抵堡前觀諸  
 渡者水湧平胸不勝望洋之恐坐久之乃解衣泗水而渡從  
 北岸東向行水從東南峽去別之乃東北逾嶺而下共三里



東渡小馬尾河復東北升嶺一里半越嶺脊東下一里半出  
山峽山乃大開成南北塢東西兩界列山環之大河湯湯流  
其間自北而南溯溪西岸循西界山北行一里路旁卽有水  
自西峽東向入溪涉之又北二里有石梁跨一西來溪上度  
之從梁端循峽西入是爲胡家司卽都勻長官司也以名同  
本郡故別以姓稱又北一里有邨在西山崖上曰黃家司乃  
其副也又北行田塍間五里度西橋又北半里入小西門是  
爲都勻郡城宿逆旅主人家爲沈姓亦江西人  
初二日晨起作書投都勻四尊張勉行四乃散步東入郡堂  
堂乃西向蟒山者又東上東山麓謁聖廟見有讀書廡東者

問南臯鄒總憲成都時遺跡曰有書院在東門內問郡志其  
友歸取以示甚畧而不詳卽大小馬尾之水不書其發源并  
不書其所注其他可知載郡八景俱八寸三分帽子非此地  
確然特出之奇也此地西門大溪上有新架石梁壘石爲九  
門甚整橫跨洪流乃不取此何耶都勻郡城東倚東山西  
瞰大溪有高岡自東山西盤而下臨溪塹溪自北來西轉而  
環其東城圓亘岡上南北各一門西有大小二門東門偏於  
山之南城後環東山之巔其上有樓可以舒眺 郡西對蟒  
山爲一郡最高之案郡治文廟俱向之其南峰旁聳有梵宇  
在其上須拾級五里而上以飯後雨作不及登謂之蟒者以

峰頭有石脊蜿蜒如巨蛇今志改爲龍山 九龍洞在城東  
十里按一統志有都勻洞在都勻長官司東十里前門北向  
後門南向當卽此洞今志稱爲仙人洞二下注云一在城東  
一在城西殊覺憤憤 水府廟在城北夢遇山太溪南下橫  
其前一小溪西自東山北直東來注下有白衣閣倚崖懸危  
壁上凭臨不測上有梵音洞西向爲門洞無他致止云其中  
有石佛自土中出者爲異耳  
初三日下午自都勻起身二十里文德宿  
初四日三十里麻哈州又十里乾溪宿  
初五日十里麻哈大堡又十里乾壩哨又十五里平越衛

初六日歇平越

初七日宿店

初八日雇貴州夫行至崖頭宿

初九日新添飯至楊寶宿

初十日龍里歇

十一日二十里至鼓角三十里至貴州

十二日止貴州遊古佛洞

十三日止貴州寓吳慎所家

十四日晨飯於吳遂出司南門度西溪橋西南向行五里有  
溪自西谷來東注入南大溪有石梁跨其上曰太子橋

此橋  
謂因

建文帝得名然橋下水湧流兩崖石間衝突甚急南來大溪  
何以太子云也所不及也度橋湖南來大溪又西南三里有一山南橫如列  
屏於前大溪由其東腋北出路從其西腋南進又南行峽間  
二里歷東山之嘴曰吧堰塘其西南有雙峰駢起其東即屏  
列山之側也又三里過雙駢東麓而出其南漸聞溪聲遙沸  
東望屏列之山之迸成峽溪形復自南來搗峽去即出其東  
北腋之上流矣第路循西界山椒溪沿東界峰麓溯行而猶  
未覲面耳又南二里始見東溪汪然有邨在東峰之下曰水  
邊寨又南三里曰大水溝有一二家在路側前有樹可憩焉  
又南漸升土阜遂東與大溪隔已從嶺上平行五里北望雙

駢又三分成筆架形矣南行土山峽中又一里出峽稍折而  
東則大溪自西南峽中來至此東轉抵東峰下乃折而北去  
有九鞏巨石梁南北架溪上是為華狕猪橋乃飯於橋南鋪  
肆中遂南向循東峰之西而行皆從土坂升陟路坦而寬九  
里見路出中岡路東水既東北墜峽下路西水復西北注坑  
去心異之稍下岡頭則路東密箐迴環有一家當其中其門  
西臨大道有三四人憩石畔因倚杖同憩則此岡已為南北  
分水之脊矣蓋東西兩界俱層峰排闥而此岡中橫其間為  
過脉不峻而坦其南即水南下矣是云獨木嶺或曰頭目嶺  
昔金鏡司在  
西界尖峰下而此  
為頭目所守處從嶺南下依東界石山行五里復升土嶺

漸轉東南嶺頭有一窪中墜從其東又南向而上共二里乃  
下一里則有溪自西北峽中出至此東轉石梁跨之是爲青  
崖橋水從橋下東抵東界山乃東南注壑去經定番州而南  
下泗城界入都泥江者也於是又出嶺南矣度橋而南半里  
入青崖城之北門其城新建舊紆而東今折其東隅而西就  
尖峰之上城中頗有瓦樓闌闔焉是日晴霽竟日夜月復皎  
青崖屯屬貴州前衛而地則廣順州所轄北去省五十里  
南去定番州三十五里東北去龍里六十里西南去廣順州  
五十里有溪自西北老龍脊發源環城北東流南轉是貴省  
南鄙要害今添設總兵駐扎其內

十五日昧爽出青崖南門山岐西向入山峽

南道大路爲  
定番州道五

里折而南又西南歷坡阜共五里有邨在路北山下曰莠樓

木樹叢密小水南流從其西入山峽兩山密樹深箐與貴陽

四面童山迥異

自入貴省山皆童然  
無木而貴陽尤甚

西北入峽三里遂西上

陟嶺一里逾嶺西下半里有泉出路旁土中其冷徹骨南下

瀉壑去又西下半里有澗自北峽來橫木橋於上其水南流

去路西度之復北上嶺一里逾脊西有泉淙淙隨現隨伏西

北行兩山夾中夾底平窪犁而爲田而中不見水又西北半

里抵西脊脊東復有泉淙淙亦隨現隨隱蓋此中南北兩界

俱穹峰而東西各亘橫脊脊中水皆中墜不見窪底故窪底

反燥而不瀦越西脊而下西北二里路北有懸泉一縷自山脊界石而下路南忽有泉聲淙淙成澗想透穴而出者半里轉而西行又半里得一邨在北山下曰馬鈴寨路由寨前西向行忽見路南澗已成大溪隨之西半里又有大溪自西峽來二溪相遇遂合而東南注壑去此水經定番州與青崖之水合而下都泥者也於是溯西來大溪之北岸又西向行二里爲水車壩壩北有土司盧姓者倚廬北峰下壩南有場在阜間川人結茅場側爲居停焉壩乃自然石灘橫截澗水飛突其上而上流又有巨木橋架溪南北其溪乃西自廣順來

廣順卽金筑安撫司乃萬歷二十五年改爲州添設流官由溪北岸溯流入爲廣順州道

由溪南岸逾嶺上爲白雲山道隨溪東南下爲定番州道乃飯於川人旅肆送火錢辭不受遂西南一里逾嶺又行嶺夾中一里半乃循山南轉半里又東轉入峽半里峽窮乃東南攀隘上其隘蘿木蒙密石骨逼仄半里逾其上又東南下截壑而過半里復東南上其嶺峻石密叢更甚焉半里又逾嶺南下隨塢南行一里是爲八壘其中東西皆山南北成壑亦有深坎墜成睥井而南北皆高水不旁泄者也直抵壑南則有峰橫截壑口西駢隘如闔東聯脊成嶺乃東向陟嶺上一里逾其脊是爲永豐莊北嶺卽白雲山西南度脊也乃南向下山又成東西塢有邨在南山下與北嶺對是爲永豐莊從

鴻中東向行二里得石磴北崖上遂北向而登半里轉而西  
半里又折而北皆密樹深叢石級迤邐有巨杉二株夾立磴  
旁大合三人抱西一株爲火傷其頂乃建文君所手植也再  
折而西半里爲白雲寺則建文君所開山也前後架閣兩重  
有泉一坎在後閣前楹下是爲跪勺泉下北通閣下石竅不  
盈不涸取者必伏而勺故名曰跪乃神龍所供建文君者中  
通龍潭時有雙金鯉出沒云由閣西再北上半里爲流米洞  
洞懸山頂危崖間其門南向深僅丈餘後有石龕可旁爲榻  
其右有小穴爲米所從出流以供帝者而今無矣左有峽高  
進而上透明窻中架橫板猶云建文帝所遺者皆神其跡者

所託也洞前凭臨諸峰翠浪千層環擁迴伏遠近皆出足下

洞左構閣祀建文帝遺像

閣名潛龍勝蹟像昔在佛閣今移置此

乃巡方使胡

平運所建前瞰遙山右翼米洞而不掩洞門其後卽山之絕  
頂逾而北開坪甚廠皆層篁聳木虧蔽日月列徑分區結靜  
廬數處而南京井當其中石脊平伏嶺頭中裂一隙南北橫  
不及三尺東西闊約五尺深尺許南北通竅不可測停水其  
間清冽異常而不減不溢靜室僧置瓢勺之余初至見有巨  
魚戲水面見人掉入竅去波湧紋激半晌乃定穴小魚大水  
停峰頂亦一異也以其側有南京僧結廬住靜故以南京名  
今易老僧乃北京者而泉名猶仍其舊也是日下午抵白雲

卷主僧自然供餐後卽導余登潛龍閣憇流米洞命閣中僧  
導余北逾香觀南京井北京老僧迎客坐廬前藝地種蔬有  
蓬蒿菜黃花滿畦鶯粟花殷紅千葉簇朶甚巨而密豐艷不  
減丹藥也四望喬木環翳如在深壑不知爲衆山之頂幽曠  
交擅亦山中一勝絕處也對談久之薄暮乃返自然已候於  
菴西復具滄啜茗移坐菴後石壁下是日自晨至暮清朗映  
徹無片翳之滓至晚陰雲四合不能於羣玉峰頭逢瑤池夜  
月爲之悵然

十六日夜聞風雨聲抵曉則風雨霏霏余爲之遲起飯後坐  
小窻待霽欲往探龍潭零雨不休再飯乃行仍從潛龍閣北  
逾嶺至南京井從岐東北入深箐中聳木重崖上下窮渺穿  
巒透碧非復人世共五里則西崖自峰頂下嵌深墜成峽中  
窪停水淵然深碧陷石脚而入不縮不盈真萬古潛淵千峰  
闕壑也其峽南北約五丈東西約丈五東崖低陷空下者約  
三丈西崖聳陷空下者十數丈水中深不可測而南透穴彌  
深蓋穿山透腹一峰中涵直西南透爲南京井東南透爲蹠  
勺泉者也崖上喬幹密枝漫空籠翠又東北攀崖東南度壑  
皆窮渺之極壑東有遺茅一龕度木橋而入爲兩年前匡廬  
僧住靜處今茅空人去將度木披之而山雨大作循舊徑返  
深靄間落翠紛紛衣履沾透再過南京井入北僧龕僧鑰扉

遊記 卷一  
往白雲惟雨中鶯粟脉脉對人空山嬌艷宛然桃花洞口逢  
也還逾潛龍閣自然已來候閣旁遂下菴淪茗炙衣晚食後  
雨少霽復令徒導由菴東登嶺角循之而北一里出其東隅  
近山皆伏其下遙山則青崖以來自龍里南下之支也稍北  
下深木中度石隙而上得一靜室其室三楹東向寥廓室前  
就石爲臺綴以野花室中編竹繚戶明潔可愛其處高懸萬  
木之上下瞰箐篁叢疊如韭畦沓沓隔以懸崖間以坑塹可  
望而不可陟故取道必迂從白雲蓋與潛龍閣後北坪諸靜  
室取道皆然更無他登之捷徑也此室曠而不襍幽而不闕  
峻而不逼呼吸通帝座寤寐絕人寰洵棲真之勝處也靜主

號啟本滇人與一徒同棲而北坪則獨一老僧也白雲之後  
共十靜廬因安氏亂各出山去惟此兩廬有棲者十二廬旁  
各有坎泉供勺因知此山之頂皆中空醞水停而不流又一  
奇也晚返白雲暮雨復至自然供茗爐旁篝燈夜話半晌乃  
卧

十七日晨起已霽而寒悄頗甚先是重夾猶寒余以爲陰風  
所致有日當解至是則日色皎然而寒氣如故始知此中夏  
不廢鑪良有以耳 白雲山初名螺擁山以建文君望白雲  
而登爲開山之祖遂以白雲名之一統志有螺擁之名謂山  
形如螺擁而不載建文遺跡時猶諱言之也土人訛其名爲



羅勇今山下有羅勇寨土人居羅勇而不知其為螺擁土人知白雲而不知即螺擁山僻地無徵滄桑轉盼如此 白雲山西為永豐莊北嶺即余來所逾嶺也東則自滇僧靜室而下即東隕頽然下對青崖皆為絕壑前則與南山夾而成塢即余來北上登級處也後則從山頂窮極窮渺北抵龍潭下為後塢即余來時所經嶺南之入壘者也此其近址也其遠者東抵青崖四十五里西抵廣順三十里東南由翥貫抵定番州三十里北抵水車壩十五里 白雲山中有元色白色諸猿每六六成行輪朝寺下 據僧言如此余早晚止聞其聲 又有菌甚美大者出龍潭後深箐仆木間玉質花腴盤朶徑尺即天花菜也

又有小者名入擔柴土人呼為茅棗雲南甚多

自青崖而西有司如之流其西又

有馬鈴寨東溪其西又有水車壩西溪皆南流合於定番而皆自石洞湧出至白雲南又有翥貴鑼鼓洞水及撒崖水皆為白雲山腹下流皆東合於定番州其南又有水埠龍 在白雲南 三十里有仙人洞其北五里又有金銀洞白牛崖 其上流亦自洞湧出而南注於都泥江則此間水無非洞出者矣 東望山脊蜿蜒自龍里西南分支南下迴繞如屏直抵泗城界此即障都泥而南趨者其山迴環而東中圍丹平平州諸司即麥冲橫梁諸水南透六洞而下都泥以此支環之也 老龍之脊自廣順北東度上寨嶺東過頭目嶺又東北過龍里之南又東過貴定縣西

南又東過新添衛之杪木寨乃東南轉環麟山之南東過為  
普林北嶺又東南抵獨山州北乃東趨黎平南境而東度沙  
泥北嶺以抵興安分界 貴州東三里為油鑿關其水西流  
西十里為聖泉北嶺其水東流北十五里為老鴉關其水南  
流為山宅溪南三十里為華狃狃橋其水北流四面之水南  
最大而西次之北穿城中又次之東為最微俱合於城南薛  
家洞東經襄陽橋東北抵望風臺從其東又稍北入老黃山  
東峽乃東搗重峽而去當與水橋諸水同下烏江者也  
十八日辭自然師下山一里半抵山麓西一里半有數家在  
南麓為永豐莊皆白雲寺中佃戶也由其前西向尖峰峽中

去是為廣順州道由其前西去南轉是為定番州道由其前

北向逾嶺是為土地關道先是自然為余策所從曰由廣順

安順西出普定其道近而兩順之間 廣順知州栢光福欲歸  
臨清安順土知州近為

總府禁苗蠻伏莽可慮不若西北由東基出平壩抵普安多

獄中 行四十里而地僻苗馴可免意外余思由兩順亦須三日行

走平壩路迂而行多亦三日可達普安遂不西行而北逾嶺

其嶺即白雲山之西垂也共一里越其北有塢東北向東南

界即白雲後龍潭之後西北界即南嶺所環轉北而東屬於

龍潭東峰之下者其中平塢一壑南北長二里水亦中窪下

墜兩旁多犁為田是名八壘北竟塢中乃北逾石嶺其半里

下北度獨木橋有塢自東北向西南是爲乾溝橫渡之北上  
半里是爲土地關下關半里鑿石坎停細流一孟曰一碗水  
行者以口就而啜之又西向一里半出峽由其北循山東北  
轉爲水車壩道由其西截塢直行一里半有邨在北山下是  
爲谷精從邨西轉又截塢而下一里轉入山峽有溪自西南  
而北卽從北峽轉而東去是水車壩之上流也其流自廣順  
州東北老龍南谷來者渡之又西越山坡旋下沂西來小流  
入其流東注南來大溪卽同之直向東去路溯溪南山峽逼  
仄時攀石上下二里餘乃西渡此水從其北西向又半里其  
北削崖高穹有洞上綴其門南向遂從其下西逾坳坳間石

骨稜厲逼屬南山迴視前溪在其下不知從何而出當亦透  
穴之流也先是自然謂余此間如馬鈴堡諸水多從山穴出  
卽水車壩水亦流自穴中者不知卽指此水抑謂南來大溪  
也逾坳西稍下約一里有路交爲十字其南北皆從山嶺上  
下有石磴透迤乃廣順達貴省道也其東西卽逾坳而西下  
峽中者從峽西下半里又聞水聲潺潺有水深白坑底東注  
坳下信乎卽坳東透穴之水矣溯之山塢復開有邨在西山  
下是爲東基下寨從其前轉而東北則下寨山之北突也循  
之一里又西北轉則西界山純削爲石而東界則土脊迤邐  
又北二里有邨當北岡之上是爲東基上寨寨中懸小支盡

遊記 卷一  
處皆瓦房鱗次非他苗寨所及由寨西北向半里有泉飛流注腋間由寨東而出寨當其中小支左右皆崇岡峻峽寨後復環一塢長疇層倚焉皆此泉之所潤而透於東岫之下者也蜿蜒上躋者一里從嶺上復北逾頂者半里下至塢中望北峰夾立甚高其下有塢自西北來者卽上寨後注腋之水從水車壩而南去者也其下有塢向東北墜者卽塢中東分之水從華犴猪橋而北出者也其塢甚平中犁爲田從田陞北上又東北升嶺半里逾峰頭而飯於是北望遙山開伏數里外石峰屏列俱不能與此山並峻矣北下甚坦半里路分兩岐一從東北行者從黃泥堡天生橋而達省一從西北行

者爲野鴨塘出平壩道遂從西北下山一里抵山下沿坡陀西行漸有小水俱從東北去二里復溯水入峽一里復陟嶺而上又二里遂西過野鴨塘有堡數十家在南山下其前有塘瀦水直逼北山然東西皆高不知從何而洩卽所謂野鴨塘是也遶堡前西南行半里望西北山崖間有洞高穹其前隴復有洞伏於下乃呼擔夫少停行李路隅余獨從西嶺橫陟之半里遂陟下洞之上隴不甚高然四面皆懸削不可下復稍西下山麓東向行遂得下洞洞門南向門中稍窪其左透崖東出另闢一門門東北向其後旋壑下陷四面寬圓雖窪而不閹旣上遂透東門而出稍下從峽中西陟上洞洞門

東向前有壘石爲垣後亦中窪而下然不甚深其上懸崖雖  
高中焉之玲瓏乳柱之天矯反不若下洞也既出復從峽中  
下轉前隴之嘴而西又經下洞前則前麓皆水草沮洳東與  
野塘相連而此則其上流也忽聞水聲潺潺自下洞前石根  
透出歷沮洳之塢而東瀦於野塘者也又從西嶺下半里仍  
抵路隅呼擔與顧奴遂西緣山坳行西望三峰攢列外又有  
峰遶之心以爲異又西四里有寨在南山下又繞其前循之  
左轉西南半里又逾一坳於是西行峽中其峽南北兩界排  
闔而前北卽所望三峰攢列者但在其內下望反不可見南  
則有崖高削上有一石倒垂石色獨白而狀如羊是爲羊吊

崖逾坳至此又一里矣其北崖中斷忽露頂上之峰盤穹矗  
豎是爲唐帽山蓋卽前望三峰至是又轉形變象耳按志唐  
帽在省城南八十里天生橋在金筑司北三十里今天生橋  
在唐帽東北三十里是天生橋去省反近而唐帽反遠不知  
當時何以分界也自然言建文君先駐唐帽後駐白雲志言  
其處可以避兵亦幽闕之區矣又西一里餘有峽南向是  
爲豬槽壑路直西逾小脊而下三里則塢開南北路交十字  
於中乃橫截之渡一小水半里有堡在西山上曰柳家堡又  
北半里又有堡在北隴上於是循其右復西上嶺一里將及  
嶺坳有泉淙淙自土穴出其色乳白渾而不清逾嶺下共二

里復塢開南北仍橫截之有澗在塢中其水甚小瀦而不流似亦北去者又西一里復上嶺其嶺南北石峰駢夾中通一坳甚逼一里越坳而西見西壑中堰水滿坡始以爲東出而實不流之波也循之又西一里則大塢擴然西去陂堰橫障而北又北循之有邨在北山之嘴曰狗塢堡乃湯吏部之佃苗也邨西平疇一塢爲膏腴之壤欲投之宿邨人弗納曰西去二里有邨亦湯氏佃丁其中可宿乃復西循平疇北隴行一里餘有石峰界平塢中削骨擎空亦獨秀之峭而險者透北峽而西又半里復得一邨入叩之其人閉戶遁去又西得一堡強入其中茅茨陋甚而卧處與豬畜同穢蓋此地皆苗

熟者雖爲佃丁而習甚鄙令人反憶土蠻竹欄爲上乘耳十九日昧爽促苗起作飯忽擔人亦呼之余心以爲異謂從來懶不肯起今何以人呼亦呼也蓋此人名王貴爲靖州太陽坪人先自三里抵藍澗彼同數人自後尾至告曰余儕欲往慶遠若此路不通迂路又太遠聞叅府以兵送行故特來附帶余納而憐之途中卽以供應其給之及抵慶遠彼已去及遊南山復遇之遂日日來候余願隨往滇中余思自慶抵南丹有夫可送至貴州界恐無負擔欲納其一人因與之約曰余此地尙無所用汝然旣隨余亦每日予工價一分若遇負擔處每日與工價三分半彼欲以二人從後聞其儕在南

山洞中以絮塞牧牛童子口余心疑之而王貴來言誘童子非伊乃同行者彼已另居於慶已請獨從後至麻哈遂漸傲慢以橈傷予足及抵貴州見余欲另覓夫復作悔過狀甚堪憐余復用之至是早起忽不見觀余所藏路費亦竟竊之去矣自余行蠻洞中以數金藏鹽筒中不意日久爲彼所窺乃不失日蠻煙虺毒之區而失之就坦遵途之日徒有悵悵而已既明擔夫竊貲已去無可奈何求苗子送出平壩不及三十里索價甚貴已而竟遁去不肯出蓋苗習素不送客予求之他苗其人曰彼好意宿汝奈何以擔累之須自負去二三里抵九家堡卽有送者遍求之其語皆然余無可奈何飯而

束擔與顧僕共擡而前行由狗場西苗堡截塢堰南過一里逾嶺西下又過一苗堡蓋轉而南又逾一嶺半里乃由嶺頭從岐路北向入塢路小山寂一里乃西向下半里有溪汪然自南而北始爲脊北第一流乃北合洛陽橋下水東經威清而下烏江者溪上舊有石橋已圯其東半涉水而渡其西半是爲九家堡乃苗之熟者也至是已近午矣始雇得一夫擔而行復西北上隴六里有邨在西山下曰二家堡從其東盤山嘴而北北界山遠闊曠然直東遙見高峰在四十里外者卽志所云馬鞍山威清之山也路復循南山之北西向入峽二里出峽有邨在南山下曰江清其處山塢大開平疇中拓

東有石峰離立卽與南山夾而爲所從之峽者也由邨東北向抵二石峰下其峰兀突南面削崖廻裂而無深洞西面有洞在峰半其門西向亟令苗子停擔峰下余先探其南面無巖可入惟西南峰下細流汨汨向麓下竅中出遂從其上躋入洞洞頂甚平間有乳柱下垂若帷帶飄搖其內分爲三層外層卽洞門之前曠若堂皇中有圓石如堆旋而成者四五丈之內卽陷空而下其下亦平整圓拓深約丈五而大倍之從其上下瞰亦頗光明蓋洞門之光旣從上倒下而其底北裂成隙亦透明於外似可挨入而未及也是爲下層下層之東其上復深入成洞與外層對第爲下陷所隔不能竟達由

外層南壁攀崖而上東透入腋列柱如門頗覺幽暗而玲瓏嵌空詭態百出披竅北下遂達中層則外層之光仍中射而入其內千柱繽紛萬竅靈幻左入甚深而窈窕莫窮前臨下層如在樓閣亦貴筑中所僅見者方攀陟不能去而苗夫在下呼促不已乃出洞而下從洞前北行升陟騰隴二里有大溪自西而東溯之西行有橋十餘鞏橫跨其上是爲洛陽橋乃新構而成者橋下流甚大自安順州北流至此曲而東注威清又北合陸廣志所謂的澄河是矣度橋北又溯流而西抵水之北來東折處遂從岐北向溯小溪行始由溪東已涉堰由溪西已復西北逾岡五里抵銅鼓山其處山塢南關北



界石峰聳立皆有洞或高或下隨峰而出西界則遙山自北而南蜿蜒如屏連裂三洞其門皆東向而南偏者最高敞其前有數十家當其下卽銅鼓寨也是洞名銅鼓洞按志銅鼓山在威清西四十五里以方隅道里計之似卽此山然其地去平壩僅五里不平壩而威清何也其洞高懸峻裂內入不甚深而前多突聳之石環牖分門反覺窈窕其右重壁之上圓穴一規北向高穹攀崖登之其中上盤空頂下墜深窅土人架木鋪竹爲墊儼然層閣頂東另透明窻窅內復有穴自下層出入土人置扉穴前晚則驅牛馬數十頭藏其中正巖之後有裂竅西南入滴瀝垂其內不絕漸轉漸隘而暗似向

無入者乃出時有一老者候余洞前余欲并探北偏中洞老者曰北洞淺不足觀有南洞在高崖上且大路所由可一登之乃循洞麓西轉不數十步則峰南果有洞出崖端其門南向其下依崖而居者猶環之爲廬乃從廬後躋級上洞門懸嵌彌高前壘石爲垣若雉堞形內深五丈餘而無懸突之石擴然高朗其後窪陷而下者一二丈然俱面陽而燥土人置廩盈其間其左腋裂竅北下漸下漸狹而卑土人曰與東洞通想卽垂瀝不絕處也亦以黑暗不暇入時顧僕與苗子壻前行已久余恐其不之待遂下山循麓西上半里逾坳則顧僕與苗夫猶待於此其坳當西界蜿蜒屏列之中脊不甚高

而石骨稜稜兩旁駢峙甚逼過隘西下塢中窪其西復有坳  
環屬蓋南北夾起危峰而東西又兩脊如屬垣窪中有小水  
牧者浸牛滿其中度窪半里又逾脊西下約一里有岐直下  
西塢者通平壩南上之道循嶺北越嶺角者爲往平壩道乃  
西北上嶺者一里逾嶺角而北又北下者一里又逾嶺西北  
一里與大道值循大道稍北遂西度田塍其半里逾小橋入  
平壩東門半里轉而南乃停擔肆中是晚覓得安莊夫市小  
鰾佐酒時方過午坐肆樓作記 平壩在東西兩山夾間而  
城倚西山麓城不甚雄峻而中街市人頗集魚肉不乏出西  
門數里有聖泉亦時涸時溢以迂道不及往

二十日早餐隨擔夫出平壩南門循西山麓南行二里有石  
坊當道其南叢山橫列小溪向東峽去路轉西峽入三里又  
隨峽南轉又二里上石子嶺逾嶺爲石子哨又七里過水橋  
屯又五里爲中火鋪又二里西上坳從坳夾行一里爲楊家  
關又西三里爲王家壑乃南轉四里爲石佛洞洞門西向不  
深有九石佛甚古 其處西抵夫茅河爲  
安酋界約五十里 又南五里平塢間水  
分南北流是爲老龍過脊又南五里爲頭鋪又南二里西入  
山坳逾之出其西又南行三里過一堡又二里上隴入普定  
北門一岐自東北來者廣順道一岐自西北來者大茅河諸  
關隘道普定城垣峻整街衢宏闊南半里有橋又南半里有

層樓跨街市集甚盛

二十一日出南門西南行十五里爲楊家橋有堡爲楊橋堡  
又南十里爲中火鋪又南一里抵龍潭山下轉入西峽西八  
里有哨轉南七里爲龍井鋪又南七里過啞泉大路從東南  
下山繞山南入安莊東門小路越嶺西而南下度小橋抵安  
莊西門安莊後倚北峰前瞰南隴而無南北門惟東西兩門  
出入西門外多客肆余乃入憩焉遂入西門遇伍徐二衛舍  
爲言此間爲安邦彥所荼毒殘害獨慘人人恨不洗其穴然  
以天兵臨之蕩平甚易而部院朱獨主撫以致天討不行而  
叛逆不戢今正月終猶以眾窺三泖河以有備而退三泖河

者去安莊西五十里一水西北自烏撒一水西南自老山中  
合併東北行故曰三泖東經大茅陸廣烏江與安限爲天塹  
者惟此今設總兵官駐其地時朱總督已斃與尸還越而按  
君馮士晉爲四川人余離貴省日亦親臨陸廣巡歷三泖將  
由安莊抵安南伍君曰按君此行亦將巡察要害分布士卒  
爲勦除之計非與朱爲比者不識然否 普定衛城內卽安  
順府所駐余先聞安順止土知州而宦籍有知府節推至是  
始知所駐在普定也 安莊衛城內卽鎮寧州所駐其公署  
在南城內段公祠之東 段公名時盛天啟四年任鎮寧道雲  
南普名勝叛踞阿迷州段統兵征之  
死於難故州人立祠祀之而招魂葬於望  
水亭之西今普名勝之子猶據阿迷州 湫傲殊甚庭有古

杉四株大合兩人抱豈亦國初之遺耶 安南衛城內卽永  
寧州所駐考一統志三衛三州舊各有分地衛俱在北州俱  
在南今州衛同城欲以文轄武實借武衛文也但各州之地  
俱半錯衛屯半淪苗孽似非當時金甌無缺矣 三衛之西  
爲水西所苦其東又諸苗襍據惟中一道通行耳

二十二日五鼓大雨達旦余少憩逆旅下午霽獨南遵大路  
一里逾嶺由岐東下半里入雙明洞此處山皆迴環成窪水  
皆下透穴地將抵洞忽塢中下裂成坑闊三尺長三丈深丈  
餘水從其東底溢出卽從其下北去溢穴之處其上皆環陸  
爲田水盈而不滲亦一奇也從此西轉則北山遂南削爲崖

西山亦削崖北屬之崖環西北二面如城半規先抵北崖下  
崖根忽下嵌成洞其中貯水一塘淵碧深泓卽外自裂坑中  
潛透而滙之者從崖外稍西卽有一石自崖頂南跨而下其  
頂與崖並起而下闕爲門高闊約俱丈五是爲東門透門而  
西其內北崖愈穹西崖之環駕而屬者亦愈合西山之南復  
分土山一支掉臂而前與東門外崖夾坑而峙昔有結高垣  
壘石址架閣於上北與東門崖對以補東向之隙而今廢矣  
由東門又數十步抵西崖下其崖自南山北屬於北崖上皆  
削壁危合下則中闕而西通高闊俱三倍於東門是爲西門  
此洞外之雙明也一門而中透已奇兩門而交映尤異其西

門之外山復四環成窪高若列城水自東門外崖北淵泓間  
又透石根溢出西門之東其聲淙淙從西門北崖又透穴西  
出門之東西皆有小石梁跨之以入北洞水由橋下西行環  
窪中又透西山之下而去西門之下東映重門北環墜壑南  
倚南山石壁氤氳結爲龕牖置觀音大士像焉由其後透穴  
南入石竅玲瓏小而不擴深可十餘丈而止此門下南壁之  
奇也北接北崖石屏中峙與南壁夾而爲門屏後則北山中  
空盤壑極其宏峻屏之左右皆有小石梁以分達之屏下水  
環石壑盤旋如帶此門下北壁之奇也北壁一屏南界爲門  
北界爲洞洞門南臨此屏中若樹塞遂東西亦分兩門南向  
水自東門下溢穴而出漱屏根而入則循屏東而架爲東橋  
而東門臨之又溢穴出西門下循屏西而架爲西橋而西門  
臨之此又洞內之雙明也先從西門度橋入洞頂高十餘丈  
四旁平覆如幄而當門獨旋頂一規圓盤而起儼若寶蓋中  
穹其下有石臺中高而承之上有兩圓窪大如銅鼓以石擊  
之分清濁聲土人詫爲一鐘一鼓云洞西北盤亘亦多垂柱  
裂隙俱迴環不深東南裂隙下高迴亦如西門而掩映彌深  
水流其前滌洄作態崆峒清冷各極其趣遂逾東橋仍出西  
門下山其前南向而上直躋崖根復有洞東向高闊俱三丈  
而深十丈洞後北轉遂上穹而黑然不甚深矣洞中乾朗有

遊記 卷一  
僧棲之而中置金仙像乃叩僧索筆攜炬同下窮西門大士  
後小穴并錄壁間詩返寓已暮

二十三日雇短夫遵大道南行二里從隴頭東望雙明西巖  
其下猶透明而東也洞中水西出流壑中從大道下復入山  
麓再透再入凡三穿巖腹而後注於大溪蓋是中窪壑皆四  
面山環水必透穴也又南逾阜四升降其四里有堡在南山  
嶺頭路從北嶺轉而西下又二里有草坊當路路左有茅鋪  
一家又西下升陟隴壑共七里得聚落一塢曰白水鋪已爲  
中火鋪矣又西二里遙聞水聲轟轟從隴隙北望忽有水自  
東北山腋瀉崖而下搗入重淵但見其上橫白闊數丈翻空

湧雪而不見其下截蓋爲對崖所隔也復逾阜下半里遂臨  
其下流隨之湯湯西去還望東北懸流恨不能一抵其下擔  
夫曰是爲白水河前有懸墜處比此更深余恨不一當其境  
心猶慊慊隨流半里有巨石橋架水上是爲白虹橋其橋南  
北橫跨下闢三門而水流甚闊每數丈輒從溪底翻崖噴雪  
滿溪皆如白鷺羣飛白水之名不誣矣度橋北又隨溪西行  
半里忽隴箐蔚蔚復聞聲如雷余意又奇境至矣透隴隙南  
顧則路左一溪懸搗萬練飛空溪上石如蓮葉下覆中剡三  
門水由葉上漫頂而下如鮫綃萬幅橫罩門外直下者不可  
以丈數計搗珠崩玉飛沫反湧如煙霧騰空勢甚雄厲所謂

珠簾鈎不捲匹練掛遙峰俱不足以擬其壯也蓋余所見瀑布高峻數倍者有之而從無此闊而大者但從其上側身下瞰不免神悚而擔夫曰前有望水亭可憇也瞻其亭猶在對崖之上遂從其側西南下復度峽南上共一里餘躋西崖之巔其亭乃覆茅所爲蓋昔望水亭舊址今以按君道經恐其停眺故編茅爲之耳其處正面掛飛流奔騰噴薄之狀令人可望而不可卽也停憩久之從亭南西轉澗乃環山轉峽東南去路乃循崖石級西南下又升陟隴壑四里西上入塢有聚落一區在東山下曰鷄公背土人指其東南峰上有洞西北向外門如豎而內可容衆有雞公焉以形似名也其洞東

透前山而此塢在其後故曰背余聞之乃賈勇先登冀一入其內比登秣有一道西南上隨之迤邐攀躋竟無旁岐已一里登嶺頭矣是爲雞公嶺坳中有佛宇問洞何在僧指在山下邨南已越之而上矣擔夫亦至遂逾嶺西向下半里抵壑中又半里有堡在南隴曰太華哨又西上嶺逾而西又一里乃迤邐西南下甚深始望見西界遙峰自北而南屏立如障與此東界爲夾互相頡頏中有溪流亦自北而南下嵌壑底望之而下一下三里從橋西度是爲關嶺橋越橋卽西向拾級上其上甚峻二里有觀音閣當道左閣下甃石池一方泉自其西透穴而出平流池中溢而東下是爲馬跑泉乃關索

之道跡也閣南道右亦有泉出穴中是爲啞泉人不得而嘗焉余勺馬跑甘冽次於惠而高山得此故自竒也但與啞泉相去不數步何良楛之異如此由閣南越一亭又西上者二里遂陟嶺脊是爲關索嶺索爲關公子隨蜀丞相諸葛南征開闢蠻道至此有廟肇自國初而大於王靖遠至今祀典不廢越嶺西下一里有大堡在平塢中曰關嶺鋪乃關嶺守禦所所在也計其地猶在山頂雖下未及三之一也至纔過午夫辭去余憩肆中

二十四日晨起以乏夫爲慮忽有駝騎至尙餘其一遂倩之議至交水以筐囊裝馬上令之先行余飯而後往西南七里

上北斗嶺一里西逾其脊有亭跨其上西望崇山列翠又自

北屏列而南與東界復頡頏成夾夾中亦有小水南去從嶺

西下二里抵夾塢中有聚落倚其麓是爲北斗鋪關嶺爲中界高山而

北斗乃其西陲雞公嶺爲東界高山而太華乃其西陲二界高嶺愈西愈高由鋪西截塢橫度二

里乃西向拾級上迤邐峰頭五里逾一坳東眺關嶺已在足

底有坊跨道曰安普封疆是爲安莊哨自關嶺爲鎮寧永寧分界而安莊謂之屯

直抵盤江皆犬牙相錯非截然各判者又西上峰峽中三里崖木漸合曰安籠

鋪又永寧屬按志有安籠箐山安籠箐關想卽此問所謂安籠守

禦所土人云在安南東南三日程此屬普州又非此矣按此

地在昔爲安氏西南盡境故今猶有安莊安籠安順安南諸



名蓋安氏之地昔以盤江爲西塹而今以三汊爲界三汊以  
南盤江以東爲中國奮武衛者僅此耳由鋪西更南上一里  
逾嶺稍下有塢中窪又西半里則重峰夾坑下墜北去盤嶺  
側西度坑坳半里復拾級上二里有菴跨道是爲象鼻嶺由  
其西度脊甚狹南北俱削壁下而成坑其上闊僅五六尺如  
度堵又宛轉北躋再過一脊共二里陟嶺頭則此界最高處  
也東瞰關嶺西俯盤江以西兩界山俱屏列於下如川字分  
行而擁之者嶺西又盤塢爲坪結城其間是爲查城卽所謂  
鼎站也有查城驛屬安南鼎站爲西界高山而白雲寺乃其西陲亦愈西愈高乃望之西北下  
而二里半而稅駕逆旅趙店江西人時駝騎猶放收中塗余小

酌肆中入觀於城而返憩肆間 其地爲盤江以東老龍第

一枝南分之脊第二枝爲關嶺第三枝爲雞公背三枝南下

形如川字而西枝最高然其去俱不甚長不過各盡於都泥

江以北其界都泥江北而走多靈者又從新添東南分支下

都勻南環獨山州北而西又東南度鷄公關而下者也 其

地東南爲募役長官司李姓東北爲營頂長官司羅姓西北爲沙

營長官司沙姓時沙土官初故其妻卽郎岱土酋之沙營東

北爲狼代土酋東北與水西接界與安孽表裏爲亂攻掠隣

境上官惟加銜餌不敢一問也 按是嶺最高西爲查城東

爲安籠箐皆絕頂迴環而成塢者在衆山之上也一統志承

寧之安籠箐關正指此普安之安籠千戶所在安南東南三日程者卽與廣西之安隆長官司接界乃田州白隘所由之道在普安安籠千戶所當作安隆與廣西同稱不當作安籠與永寧相涵也 鼎站之峽從東北向西南其東南卽大山之脊而查城倚其西北亦開一峽而去乃沙營土司道也其泉源亦自東北脊下穿站街而西南墜峽底西南峽脊亦環接無隙遂從其底穿山腹西去當西注盤江者矣

黔遊日記二

二十五日晨起自鼎站西南行一里餘有崖在路右上下各有洞洞門俱東南向而上洞尤空闊以高不及登路左壑泉已成澗隨之南半里山廻壑盡脊當其前路乃上躋水則自其下入穴盤折二里逾坳脊是爲梅子關越關而西路左有峽復墜坑而下東西徑一里而西復廻環連脊路循其上平行而西復逾脊始下陟二里又盤塢中山西南轉二里復西北上一里是爲黃土壩蓋鼎站之嶺至此中降又與西嶺對峙成峽有土山中突而連屬之其南北皆墜峽下中踞若壩然其二黃土壩者以此有數家倚西山而當其坳設巡司以稽察焉又上逾嶺脊共五里爲白雲寺於是遂西南下迤邐四里途中扛擔絡繹車騎相望則臨安道母忠以欽取入京也司道無欽取之例其脾如此當必有說按母川人本鄉薦

豈果有卓異特達聖聰耶然聞阿迷之僭據未復而輿扛之  
紛紜實繁其才與操似俱可議也又至塢底西北上一里爲  
新鋪由鋪西稍逾嶺頭遂直垂垂下五里過白基觀觀前奉  
眞武後奉西方聖人中頗整潔時尙未午駝騎方放牧在後  
余乃入後殿就淨几以所攜紙墨記連日所遊蓋以店肆雜  
沓不若此之浮而幽也僧檀波甚解人意時時以茶蔬米粥  
供下午有象過二大二小停寺前久之象奴下飲瀕去象輒  
跪後二足又跪前二足伏而候升旣而駝騎亦過余方草記  
甚酣不暇同往又久之雷聲殷殷天色以雲幕而暗辭檀波  
以小禮酬之固辭不受初余以爲去盤江止五里耳至是而

知駝騎所期舊城尙在盤江上五里亟爲前趨乃西向直下

三里有枯澗自東而西新構小石梁跨之曰利濟橋越橋度

澗南又西下半里則盤江沸然自北南注其峽不闊而甚深

其流渾濁如黃河而甚急萬山之中衆流皆清而此獨濁不

知何故

余三見此流一在武宣入柳江亦甚濁一在三  
鎮北羅木渡則清一在此復濁想清乃涸時也

東岸南行半里抵盤江橋橋以鐵索東西屬兩崖上爲經以

木板橫鋪之爲緯東西兩崖相距不十五丈而高且三十丈

水奔騰於下其深又不可測初以舟渡多漂溺之患壘石爲

橋亦多不能成崇正四年今布政朱

名家民  
雲南人

時爲廉憲命安

普遊擊李芳先

四川

以大鐵練維兩崖練數十條鋪板兩重

其厚僅八寸闊八尺餘望之飄渺然踐之則屹然不動日過  
牛馬千百羣皆負重而趨者橋兩旁又高維鐵練爲欄復以  
細練經緯爲紋兩崖之端各有石獅二座高三四尺欄練俱  
自獅口出東西又各跨巨坊其東者題曰天塹雲航督部朱  
公所標也其西者題曰□□□傳宗龍時爲監軍御史所  
標也傳又豎穹碑題曰小葛橋謂諸葛武侯以鐵爲瀾滄橋  
數千百載乃復有此故云余按渡瀾滄爲□□乃漢武故事  
而瀾滄亦無鐵橋鐵橋故址在麗江亦非諸葛所成者橋兩  
端碑刻祠宇甚盛時暮雨大至不及細觀度橋西已入新城  
門內矣左轉瞰橋爲大願寺西北循崖上則新城所環也自

建橋後增城置所爲鎖鑰之要云聞舊城尙在嶺頭五里急

冒雨竭蹶躋級而登一里半出北門又北行半里轉而西透

迤而上者二里雨乃漸霽新城內所上者峻城外所上者坦西逾坳循右峰

北轉又半里則舊城懸嶺後岡頭矣入東門內有總府鎮焉

其署與店舍無異早晚發號用喇叭聲亦不揚金鼓之聲無

有也青崖總兵姓班三泖總兵姓商此間總兵姓胡添設雖多而勢不尊矣是夜宿張齋公家

軍人也

二十六日駝馬前發余飯而出舊城西門始俱西南行從嶺

塢升降五里有一二家在南隴下爲保定鋪從其側西上嶺

漸陟隆崇三里忽有水自嶺峽下循峽而上峽中始多田塍

蓋就水而成者時已捕又上二里是為涼水營由營西復從  
山塢逶迤而上漸上漸峻又五里遇駝馬方牧余先發將逾  
坳坐坳下石間少憩望所謂海馬嶂者欲以形似求之忽有  
人自坳出負罌汲水由余前走南岐去余先是望南崖迥削  
有異而未見其岐至是亟隨之抵崖下則穹然巨洞其門北  
向其內陷空而下甚宏其人入汲於石隙間隨處而是皆自  
洞頂淙淙散空下墜土人少鑿坯承之水從洞左懸頂下者  
最盛下有石臺承之臺之側鑿以貯汲者洞從右下者最深  
內可容數百人而光明不闕然俱無旁隙別竅若堵墻而成  
者也出洞仍由舊路出大道登坳即海馬嶂有真武閣跨坳

間余入憩閣間取筆楮記游而駝馬已前去久之乃行其內  
即為海馬鋪去城十里矣其處北兩日半程為小米馬場有  
堡城下臨盤江隔江即水西地南兩日程為乖場河水漲難  
渡即出鉛之所也又西循南嶺而行見其塢皆北向墜然多  
中窪而外橫巨者連西又稍上二平脊其三里則北度而轟  
者其峰甚高是為廣山其上李芳先新結浮屠為文曲星蓋  
安南城東最高之巔也又西二里為茶菴其北有山欹突可  
畏作負嶠之勢者舊名歪山今改名威山余望之有異而亟  
於趨城遂遵大路而西又三里復逾一阜又二里稅駕於安  
南城之東關外逆旅陳貢士家

遊記 卷一  
二十七日駝馬已發余乃飯問知城東五里山茶菴而北有威山山間有洞從東透西又有水洞其中積水甚深其前正瞰衛城遙指其處雖在山巔然甚近也乃同顧僕循昨來道五里東抵茶菴遂由岐北向入山一里抵山左腋則威山之脈自北突而南南聳而北伏南削而北垂東西皆巨崖斜騫而南上從南麓復起一小峰亦如之入東峽又一里直抵山後則與東峰過脊處也由脊北下甚深而路蕪由脊西轉循山北峰之半西行路蕪而磴在循之行則北塢羃霧從塢中起瀾漫北峰咫尺不可見而南面威山之北惟行處猶朗而巔亦漸爲所籠西行半里磴乃南上拾級而登者半里則峰

之北面全爲霧籠矣乃轉東北上則東崖斜騫之上也石脊甚狹由東北上西南如攀龍尾而升復見東南峰外澄霄麗日遙山如靛余所行之西北則瀾淪如海峰上峰下皆入混沌若以此脊爲界者蓋脊之東南風所從來故風羃淨捲脊之西北風爲脊障毒霧遂得倚爲窟穴予夙願一北眺盤江從來處而每爲峰掩至是適登北嶺而又爲霧掩造化根株其不容人窺測如此攀脊半里有洞在頂崖之下其門東向上如合掌稍窪而下底寬四五丈中有佛龕僧榻遺飯猶存而僧不知何兩旁頗有氤氳之龕其後直透而西門乃漸狹而低亦尖如合掌其門西徑山腹而出約七丈餘前後通望而下不見

者以其高也出後門上下俱削崖疊石路緣崖西南去十餘丈復有洞西向門高不及丈而底甚平深與闊各二丈而洞後石縷續紛不深而幻置佛座其中而前建虛堂已圯不能存其前直瞰衛城若垂趾可及偶霧氣一吞忽漫無所睹不意海市蜃樓又在山阿城郭也然此特洞外者也由洞左旁竅東向入其門漸隘而黑攀石闕上其中坎硤嵌窪竇不一皆貯水滿中而不外溢洞頂滴瀝下注水池如雜珮繁絃鏗鏘遠近洞內漸轉東北勢似宏深淵墜既水池高下無可着足而無火炬遙燭惟從黑暗中聽其遙響而已余所見水洞頗多而獨此高懸眾峰之頂又瀦而不流無一滴外洩向

所望以爲獨石凌空而孰意其中乃函水之具耶出洞仍循崖而北入明洞後門抵前洞從僧榻之左有旁龕可登攀而上之則有隙西透若窻而岐爲兩其後復有洞門西向在崖路之上其門頗敞第透隙處雙楹逼仄祇可外窺不能穿之以出耳先是余入前洞見崖間有鐫三明洞三字者從洞中直眺但見前後而不知旁觀更有此異也下洞由舊路三里出茶菴適按君馮<sup>士</sup>以專巡至從來直指巡方不逾關嶺盤江馮以特命再任故歷關隘至此耳時旌旗穿關逾坳瞻眺之空山生色第隨其後抵安南不免徒騎雜沓五里之程久乃得至乃飲於陳氏肆中遂入東門西抵衛前轉南而出南

門南向行嶺峽間共平上二里有脊自西北度東南度處東平爲塍西忽墜坑深下有小水自坑中唧唧出路隨之西循北崖下墜卽所謂烏鳴關也

烏鳴關在安南衛

士人呼爲老鴉關西

向直下一里有茶菴跨路隅飛泉夾灑道間卽前唧唧細流至此而奔騰矣菴下崖環峽仄極傾陷之勢又曲折下半里泉溢浹道有穹碑題曰甘泉勝蹟其旁舊亦有亭已廢而遺址豐碑尙在言嘉靖間有僧施茶膳衆由嶺下汲泉甚艱一日疏地得之是言泉從僧發者余憶甘泉之名舊志有之而唧唧細流實溢於嶺上或僧疏引至此不爲無功若神之如錫阜龍移則不然也又拾級西南下一里下抵峽口循西崖

之足轉而西行北則石崖排空突兀上壓南則墜壑下盤坵埵縱橫皆犁爲田雖升降已多猶平行山半也又西半里有泉自北崖裂隙間宛轉下注路經其前爲架橋橫度泉落於橋內復從橋下瀉峽去坐橋上仰觀之崖隙歌曲泉如從雲葉間墮出或隱或現又瀑布一變格也循崖又西迤邐平上兩過南度之脊漸轉西北共五里爲烏鳴鋪復西北下峽間一里餘有小水一自東峽來一自北峽來各有石梁跨之合於路左而東南去度兩石橋又西南上嶺一里從嶺頭過一哨有數十家夾道又從嶺上循北界大山西向行其南復平墜成壑下盤錯爲田甚深其南遙山與北界環列者聳如展



屏而北角獨尖豎而起環此壑而東度土脊一支遙屬於北  
界大山所過嶺頭夾峭處正其北屬之脊也余先是從海馬  
嶂西卽遙從嶺隙見西峰繚繞而此峰獨方頂迴出如屏間  
騎夫江西坡卽此峰否對曰尙在南余望其峒入處反在北  
心惑之至是始知其卽東向分支之脊路雖對之行而西坡  
實在其北循北嶺升降曲折皆在峰半行又西北二里西南  
二里直墜坡而下者二里緣嶺西轉者一里是爲納溪鋪蓋  
在北崖南墜之下雖所下已多而猶然土山之脊也由鋪西  
望則東西山又分兩界有水經其中第此兩界俱支盤隴錯  
不若關嶺之截然屏夾也復西南下一里半有水從東崖墜

坑而出西懸細若馬尾從其北路亦墜崖而下又二里餘抵  
塢中巨橋三門跨兩隴間水從東一門湧而北出其西二門  
皆下平爲田豈水涸時耶其水自西南諸峽中各趨於橋之  
南墜峽而下經橋下北注而出於盤江上流其納溪之名以  
此耶度橋復西北上嶺是爲江西坡以嶺在溪之西也路從  
夾岡中透壁盤旋而上一里出夾復拾級上一里得茅菴在  
坡之半又北上拾級半里抵嶺頭其北有峰夾塢尙高東望  
納溪鋪之綴東崖者高下正與此等於是又西向平陟嶺間  
二里挾南峰轉循其西又西向行半里則嶺上水多左右墜  
又東北下轉則一深塹甚逼自西南墜東北若劃山爲二者

度小石梁而西又西北逾嶺頭其一里而入西坡城之東南門是爲有嘉城

二十八日出西坡城之西北門復西向陟嶺盤折而上二里始升嶺頭其北嶺尙崇循其南而西又二里望西北一峰甚近而更聳有霧籠其首以爲抵其下矣又西一里稍降而下忽有脊中度左右復中墜成峽分向而去其度脊闊僅二尺長亘二三丈而已爲東西聯屬之蒂始知西坡一山正如一芝側出東西徑僅十里南北兩垂亦不過二三十里而此則其根蒂所接也度脊始上雲籠高峰又二里盤峰之南是爲倪納鋪數十家後倚高峰南臨遙谷前所望方頂屏列之峰

正亘其南指而詢之士人曰是爲兎場營其南爲馬場營最

南爲新安二所

新爲新城所安爲安籠所卽與廣西安隆土司爲界者

由鋪之西半里

有脊自山前塢中南度復起山一支繞於鋪前脊東西流水俱東南入納溪橋之上流者第脊西之流墜峽南搗甚逼又稍北循崇山而西半里有脊自南嶺橫亘而北中平而不高有堡樓峙脊間是爲保家樓已爲獾獌哨守之處其脊自西南屏列而來至此北度東起而爲高峰卽倪納後之霧籠者西亘而成石崖卽與來脊排闥爲西夾塢者由脊北循石崖直西行夾塢之上是爲三條嶺西四里石崖垂盡有洞高穹崖半其門南向橫拓而頂甚平又有一斜裂於西者其門亦南向而門

之中有懸柱焉其前塢中水繞入西南峽路乃稍降復西上  
嶺坳共三里爲芭蕉關數十家倚北山南突之坳間水繞突  
峰之南復北環關西而出過關則墜峽而下復與水遇是爲  
普安東境之要害然止鋪舍夾路實無關也由其西降峽循  
水路北重崖層突多赭黑之色聞有所謂弔崖觀音者隨崖  
物色之二里見崖間一洞懸踞甚深其門南向而無路乃攀  
陟而登則洞門圓僅數尺平透直北十餘丈而漸黑似曾無  
行跡所入者乃返出洞口則滿地白骨不知是人是畜也仍  
攀崖下又西有路復北上崖間其下門多牛馬憩息之所汚  
穢盈前其上層有垂柱空其端而置以小石大士乃出人工

非天然者復下循大路隨溪西一里溪轉北向墜峽去於是

復西涉坡阜共六里而至新興城

自芭蕉關而來所降不多而上亦不遠其塢間溪猶

出山上也

入東門出西門亦殘破之餘也

有碑爲天啟四年都中御史烏程閔公所復

有坐鎮守備

是晚按君宿此

又西行嶺峽間二里連逾二嶺脊皆自

南北度者忽西開一深壑中盤旋爲田其水四面環亘不知  
出處路循東峰西南降一里復轉南向上一里又轉東南上  
半里逾嶺脊而南乃西南下一里西抵塢中間水聲淙淙甚  
急忽見一洞懸北崖之下其門南向而甚高溪水自南來北  
向入洞平鋪洞間深僅數寸而闊約二丈洞頂高穹者將十  
丈直北平入者十餘丈始西關而有層坡東墜而有重峽內

巨而有懸柱然漸昏黑不可攀陟矣此水當亦北透而下盤江者出洞微洞名於土人對曰觀音洞微其義以門上崖端有置大士像於其穴者也洞前溪由東南峽中來其峽底頗平大葉蒲叢生其間淬綠鏘於風前搖青萍於水上芄芃有光循之西南半里又西穿嶺隙間漸循坡躡脊二里有一二家在北峰下其前陷溪從橫水由西南破壑去路由西北循嶺上一里出嶺頭是爲藺家坡西南騁望環山屏列甚遙其中則峰巒簇簇盤伏深壑間皆若兒童匍匐成行無與爲抗從此乃西北下直降者二里又升降隴脊西行者二里有菴綴峰頭曰羅漢松以樹名也自逾新興西南嶺羣峰翠色茸

茸山始多松然無喬枝巨本皆弱幹糾纏垂嵐拂霧無復吾士凌霄傲風之致也其前又西南開峽從峽中直下者三里轉而西平行者一里有城當坳間是曰板橋鋪城城當峽口仰眺兩界山凌空而起以爲在深壑中矣不知其西猶墜坑下也路在城外西北隅而入城中之西門

二十九日出板橋城之西門北折入大路遂拾級下有小水自右峽下注逾其左隨之行一里則大溪汪然自西南轉峽北注有巨石梁跨其上卽所謂三板橋也今已易之石而鋪猶仍其名耳橋上下水皆闊獨橋下石峽中束流急傾湧其水西北自入納山發源流經軟橋又西南轉重谷間至是北

搗而去亦深山中一巨壑也越橋西溯溪北崖行一里溪由  
 西南谷來路入西北峽去於是升降隴坳屢越岡阿四里直  
 西山復曠然平伏獨西南一石峰聳立路乃不從西平下反  
 轉南仰躋半里盤石峰東南有石奮起路右首銳而灣突肩  
 齊而竝聳是曰鸚哥嘴又西轉而下者一里半有鋪肆夾路  
 曰革納鋪上音納俱作捺至是而始知所云  
捺溪倪捺皆納字也惟此題鋪名又從峽平行緣  
 坡升降五里有哨舍夾路曰軟橋哨由哨西復墜峽下遙見  
 有巨溪從西峽中懸迅東注下峽一里卽與溪遇其溪轉向  
 南峽去路從溪北溯溪循北山之麓西行二里有巨石梁南  
 北跨溪上卽所謂軟橋也余初疑冉姓者所成及讀真武廟

前斷碑始知爲軟想昔以篾索爲之今已易之石而猶仍其  
 名耳度橋而南遂從溪南西向緣南崖而上其躋甚峻半里  
 平眺溪北山俱純石而綠樹緣錯成文其中忽有一瀑飛墜  
 自峰頂直掛峽底緣南崖西上愈上愈峻而北眺翠紋玉瀑  
 步步回首不能去上二里峽底溪從西北而出嶺頭路向西  
 南而上又一里過真武廟按君自新興而  
來越此前去由其西南向行遂  
 下塢中又西南共四里兩越小嶺而下有峽自東南達西北  
 又兩界山排闥而成者其中頗平遠有聚落當其間曰舊普  
 安按君飯於鋪館余復先之而西北由塢中行東北界山透  
 迤繚繞不甚雄峻西南界山踞躔離立復露森羅峽蹤雖遠

然兩頭似俱連脊中平而無洩水之隙者又西三里有石峰  
中起分突塢間神宇界其下曰雙山觀按君自後來復越而前去又西一  
里則西脊迴環於前遂塢窮谷盡塢底有塘一方滙環坡之  
麓四旁皆石峰森森繞塘亦多石片林立亦有突踞塘中者  
於是從塘西南上迴坡一里登其脊又宛轉西行嶺頭嶺左  
右水俱分瀉深谷北出者當從軟橋水而入盤江上流南流  
者當從黃草壩而下盤江下流又西向從嶺頭升陟其上多  
中窪之宕大者盤壑爲田小者墜穴爲阱共五里爲水塘鋪  
乃飯於廟間過鋪西下嶺逶迤山半又五里過高笠鋪南向  
行隴間逾一平嶺西南下又五里有小溪自北峽來石橋南

跨之度其南北門街夾峙岡上逾岡南下始成市有街西去  
爲雲南坡大道直南又一小溪自西南峽來石橋又南跨之  
橋南卽爲普安城州衛俱在其中按君已駐署中矣其城西半倚山

脊東半下臨東溪南北二門正當西脊之東麓而東門則瀨  
溪焉南門外石橋則三溪合於北經東門而西環城南又南  
去而注於水洞者北門外石橋第一橋卽雲南坡之水繞城  
西北隅而爲塹東下而與北溪合於城東第二橋卽小溪自  
西北來者一統志所云目前山之水也第三橋卽小溪自北  
來者一統志所云沙莊之水也三溪交會於城之東北合而  
南去是爲三一溪經城南橋而入於水洞其城自天啟初爲

水西叛逆諸蠻應而攻圍一年而破後雲南臨安南土官沙姓者奉調統兵來復

至今瘡痍未復然是城文運為貴筑之首前有蔣都憲今有

王宮詹名祚遠非他衛可比州昔惟土官姓龍其居在入納山下統十二小土司今

土官名子烈年尙少後設流官知州姓黃竝治焉 州東北七十里有八納

其山高冠一州四面皆石崖巔絕惟一徑盤旋而上約三十

里龍土官司在其下其頂甚寬平有數水塘盈貯其上軟橋之水所

由出也土音以納為但而梵經有叭咀哆之音今老僧白雲

南京人因稱叭咀山遂大開叢林而曩地遠隔尙未證果 州

南三十里有丹霞山其山當叢峰之上更起尖峰卓立於中

西界有山一支西南自平彝衛屏列而北迤邐為雲南坡而

東下結為州治西屏之中其最高處曰睡寺山正與丹霞東

西相對其東界有山南自樂民所分支而北當丹霞山南十

里西界屏列高山橫出一支東與東界連屬合併而北天矯

叢沓西突而起者結為丹霞山東北聳突而去者漸東走而

為兎場營方頂之山而又東北度為安南衛脈其橫屬之支

在丹霞山南十里者其下有洞曰山嵐洞其門北向水從洞

中出北流為大溪經丹霞山之西大水塘塢中又北過趙官

屯又東轉而與南板橋之水合由洞門溯其水入南行洞腹

者半里其洞劃然上透中滙巨塘深不可測土人避寇以舟

渡水而進其中另闢天地可容千人而丹霞則特拔眾山之

上石峰峭立東北惟入納山與之齊抗入納以危擁為雄此

峰以峭拔擅秀昔有元帝宮天啟二年毀於蠻寇四年不昧

師徽州人復鼎建每正二月間四方朝者駢集日以數百計僧

又捐貲置莊田環山之麓歲入穀三百石而嶺間則種豆為蔬歲可得豆

三十石以供四方但艱於汲水尋常汲之嶺畔往返三里皆峻

級遇旱則往返十里而後得焉

五月初一日余束裝寄逆旅主人符心華寓蘭溪人乃南抵普

安北門外東向循城行先是駝騎議定自關嶺至交水至是余欲往丹霞彼不能待計程退價余倉卒收行李其物仍為夫盜去窮途之中屢遭撈竊其何甚乎復隨溪南轉過東門又循而

抵南門有石梁跨溪上越其南水從西崖向南谷路從東坡

上南嶺西眺水抵南谷崖環壑絕遂注洞南入時急於丹霞

不及西下二里竟南上嶺從嶺上行又二里逾嶺轉而西其

兩旁山腋多下墜之穴蓋其地當水洞東南其下中空旁透

下墜處是透穴之通明者也又西南一里路右一峽下迸有

巖西南向其上甚穹乃下探之東門有側竇如結龕門內窪

下而中平無甚奇幻遂復上南行又一里逾嶺脊遂西南漸

下行坡峽間一里過石亭壘址其南路分兩岐由東南者為

新安二所黃草壩之徑由西南者則向丹霞而南通樂民所

道也遂從西南下從嶺峽中平下者二里東顧峽坑墜虛有

水透崖南出余疑為水洞所洩之水而其勢頗小上流似不



雄壯從其西遂西南墜坑而下一里抵壑中則有溪汪然自西而東注小石梁跨其上曰南板橋以別於北大道之三板橋也其下水西自石洞出卽承水洞之下流至是而復透山腹也水從橋東又合南峽一溪東向而去東北合軟橋下流出北板橋而東與盤江合其南峽之溪則自大水塘南山風洞來二溪一北一南皆透石洞而出亦奇矣越南板橋南一里溯南來溪入南峽轉而西行峽中又二里則有壩南北橫截溪上其流湧壩下注闊七八丈深丈餘絕似白水河上流之瀑但彼出天然而此則人堰者也壩北崖有石飛架路旁若鷓首掉虛而其石分竅連枝玲瓏上透嵌空湊合亦突崖之一奇也又

西三里路緣北崖而上西越之而下其半里山迴水轉其水又自南向北而來者其先東西之峽甚束至是峽之成南北者漸寬又循溪西崖南向行一里南逾一突嘴則其南峽開而盤成大塢南望有石梁橫跨溪上半里度石梁而東遂東南上坡始與南來之溪別東上半里過一邨又東半里轉而南稍下其半里逾小溪而上過趙官屯遂由屯邨北畔東南入塢二里復上嶺一里轉峽處有水飛墜山腰循山嘴又西轉而南半里隨峽東入又半里峽中有水自東峽出卽飛瀑之上流也小石梁跨峽而南石碑剝落卽丹霞山建橋記文也由橋南西向盤嶺爲大水塘之遂由橋東向溯水而入其

下峽中菁樹蒙密水伏流於下惟見深綠一道迤邐谷底又東半里內塢復開中環爲田而水流其間路循山南轉半里入竹樹間有一家倚山隈結廬下瞰壑中平疇而棲余以爲非登山道矣忽一人出呼余由其前稍轉而東且導余東南登嶺乃下耕塢中去及余躋半里復西入樵徑其人自塢中更高呼稍東遂得正道其處四山迴合東北皆石山突兀而余所登西南土山則松陰寂然無挺拔之勢而偃仰盤曲雖小亦然遂藉松陰以手掬所攜飯搏而食覺食淡之味更長也旣而循坡南上者半里又入峽西上者一里又南逾坳春間半里其坳兩旁石峰東西湧起而坳中則下陷成井灌

木叢翳其間杳不可窺已循東峰之南又轉而東南盤嶺半里其兩旁石峰又南北湧起而峽中又下陷成窪又稍轉東北路成兩岐一由北逾峽一由東上峰余不知所從乃從東向而上者其兩旁石峰復南北湧起半里陟其間漸南轉又半里南向躋其坳則兩旁石峰又東西湧起越脊南始見西南一峰特聳形如天柱而有殿宇冠其上乃西南下窪間半里復南上岡脊迴望所越之脊有小洞一規其門南向其西有石峰如展旗其東岡之上復起亂峰如湧髻而南岡則環脊而西遂轟然起丹霞之柱焉其中迴窪下陷底平如鏡已展上爲田第無滴水不堪插蒔由岡西向躋級登降級緣峰

西石崖其上甚峻已而崖間懸樹密蔭無復西日之爍直躋半里始及山門其門西北向而四週籠罩山頂時僧方種豆隴坂間門閉莫入入之一徒自下至號照塵啟門入余遂以香積供既而其師影修至遂憇余閣中而飲以茶蔬影修又不味之徒也時不昧募緣安南影修留余久駐且言其師在必不容余去以余乃其師之同鄉也余謝其意許為暫留一日初二日甚晴霽余時徙倚四面凭窻遠眺與影修相指點其北近山稍伏其下為趙官屯漸遠為普安城極遠而一峰危突者入納也相去已百里其南稍下而橫脊擁其後為山嵐洞極遠而遙峰隱隔者樂民所之南與亦佐縣為界者也其西墜

峽而下為大水塘塢中自南而北山嵐洞之水北出南板橋者也隔溪則巨峰排列亦自南而北所謂睡寺山矣山西即亦資孔大道而嶺障不可見其東僅為度脊上堆盤髻之峰稍遠則駢岫叢沓迤邐東北去為兔場營方頂山之脈者也山東南為歸順土司普安龍土司之屬與西粵土司同名越其東南為新安二所黃草壩諸處與泗城接界矣是日余草記閣中影修屢設茶供以雞蓼菜藟漿花藤如婆婆婆針線斷其葉蒂輒有白漿溢出花蕊每一二十莖成一叢莖細如髮長半寸綴花懸蒂間花色如淡桃花連叢採之黃連頭皆山蔬之有風味者也初三日飯後辭影修送余以茶醬粵西無醬貴州間有之而甚貴以鹽少故而是山始有醬食遂下山十里北過趙官屯十里東北過南板橋七

里抵普安演武場由其西橫嶺西度一里望山一溪北來有崖當其南知洞在是矣遂下則洞門北向迎溪前有巨石坊題碧雲洞天始知是洞之名碧雲也土人以此爲水洞以洞其上有佛者爲乾洞前一巨石界立門中門分爲二路由東下水由西入入洞之中則擴然無間水循洞西路循洞東分道同趨南向十餘丈漸昏黑矣忽轉而東水循洞北路循洞南其東遂穹然大關遙望其內光影陸離波響騰沸而行處猶闇闇也蓋其洞可入處已分三層其外入之門爲一層則明而較低其內闕之奧爲一層則明而彌峻當內外轉接處爲一層則暗而中坳稍束如門高穹如橋聳豁不如內層低垂不如外層而獨界

其中內外迴眺雙峰對峙卽從暗中仰矚其頂又有一圓穴上透其上亦光明開闢若樓閣中函恨無由騰空而上也東行暗中者五六丈而出則堂戶宏崇若阿房未央四圍既拓而峻發彌甚水從東南隅下搗奧穴而去光從西北隅上透空明而入其內突水之石皆如踞獅泛鳧附壁之崖俱作垂旂矗柱蓋內奧之四隅西南爲轉入之橋門西北爲上透之明穴東南爲入水之深竅而獨東北迴環迴邃深處亦有穴高懸其前有智窟下墜黑暗莫窺其底其上有側石環之若井欄然豈造物者恐人暗中失足耶由窟左循崖而南有一石脊自洞頂附壁直垂而下痕隆起壁間者僅五六寸而鱗

甲宛然或巨或細是爲懸龍脊儼有神物浮動之勢其下西  
臨流側石畦每每是爲十八龍田由窟右循崖而東有一石  
痕亦自洞頂附壁直垂而下細紋薄影是爲蛇退皮果若遺  
蛻粘附之形其西攀隙而上則明窻所懸也其窻高懸二十  
丈峻壁削立而多側痕錯鐸緣之上躋則其門擴然亦北向  
而出縱橫各三丈餘外臨危坡上倚峭壁卽在水洞之東但  
上下懸絕耳門內正對矗立之柱柱之西南卽橋門中透之  
上層也余旣躋明窻旋下觀懸龍蛇蛻仍由碧橋下出飯於  
洞門石上石乃所鐫詩碑游人取以爲臺以供飲饌其詩乃  
張渙沈思充者詩不甚佳而渙字極適活可愛鐫碑欲垂久

遠而爲供飲之具將磨漚不保矣亟出紙筆錄之仍入內洞  
欲一登碧橋上層而崖壁懸峭三上三却再後仍登明窻東  
南援蠹柱之腋透出往南平視碧橋之背甚坦而近但懸壁  
無痕上下俱絕攀踐咫尺難度於是復下而出洞日已下春  
因解衣浴洞口溪石間半載風垢以勝流浣濯之甚快也旣  
而拂拭登途忽間崖上歌笑聲疑洞中何忽有人迴矚之乃  
明窗外東崖峭絕處似有人影冉冉余曰此山靈招我不可  
失也先是余聞水洞之上有梵龕及至索之無有從明窻外  
東眺層崖危聳心異之亦不見有攀緣之跡及出水洞覓路  
旁有小逕隱現伏草間又似上躋明窻者以爲此間乃斷崖

絕磴耳不意聞聲發闕亟迴杖上躋始向明窻之下旋轉而東拾級數十層復躋危崖之根則裂竅成門其門亦北向內高二丈餘深亦如之左有旁穴前透多裂隙垂櫺僧以石窒之爲室右有峭峽後坵上頗氤氳盤結而峻不可登洞中有金仙三像一僧棲其間故遊者攜樽壘就酌於此非其聲余將茫茫返城不復知水洞之外復有此洞矣酌者僕從甚都想必王翰林子弟余遠眺而過之下山循溪溯流二里有大道卽南門橋遂從南門入躡山坡北行城中荒敞甚茅舍離離不復成行東下爲州署門廨無一完者皆安酋叛時城破鞠爲坵莽至今未復也出北門還抵逆旅是晚覓夫不得遂

卧 按君是早  
返轅矣

初四日覓夫不得候於逆旅稍散步北寺惟有空樓層閣而寂無人焉乃構而未就者還悶悶而卧

初五日仍不得夫平明微雨旣止而雲油然四布是日爲端午市多鬻蒲艾者雄黃爲此中所出然亦不見巨塊市有肉而無魚余兀坐逆旅囊中錢盡不能沽濁醪解愁回想昔年雉山之樂已分霄壤

初六日夜雨達旦夫仍不得旣午過金重甫者麻城人也賈而儒索觀余諸公手卷爲余遍覓夫竟無至者

初七日囊錢日罄而夫不可得日復一日不免悶悶是早金

重甫言將往荊州余作書寄式園叔下午彼以酒資奉雖甚鮮而意自可歎

初八日候夫雖有至者而惡主代爲措價力阻以去下午得

騎亦重價定之無可奈何也

余所遇惡人如衡陽劫盜狗場

矣此寓所竊初疑爲騎夫後乃知爲符主也人之無良如此夫劫盜拐徒無論如南寧梁冲宇寶檀僧併此人俱有害人之心余以萬里一身脫其虎口亦幸矣

初九日平明以行李付騎別金重甫乃行是早雲氣穠郁從普安北門外第一溪橋北循西峽入過稅司前漸轉西南皆溯小溪西岸行西山崇隆小瀑屢屢從山巔懸注南五里始西南登坡是爲雲南坡初二里稍夷又一里半甚峻過一脊

而西復上坳其一里爲馬鞍嶺越而西遂循嶺西向西南行

於是升降在嶺頭盤折皆西南俱不甚高深五里稍降塢中

爲坳子哨

先是每處有打哨之苦此爲第一哨今纔奉憲禁井於一處過無問者

又南越一坳

大雨淋漓仍前升降大峰之西冒雨又十五里而至海子鋪山塢稍開頗大中有水塘卽所謂海子也有小城在其南是

爲中火鋪普安廿二哨俱於此并取哨錢過者苦焉

先各哨分取今

井取於此哨目止勒索駝馬擔夫見余輩亦不甚阻撓余乃入城飯於肆復出南門南向登山五里遇駝馬方牧於山坡雨復大至余乃先行升降高下俱依東大山而南兩旁多習井墜坑不辨水從何出又五里爲大河鋪有水自鋪東平瀉坡陀

下漫流峽中路隨之而南天乃大霽忽雲破峰露見西南有  
山甚高土人稱爲黑山雲氣籠罩時露一班直上與天齊望而趨五  
里大河之水已漸墜深塹似從西北圻峽去路東南緣嶺透  
峽東下則山環塢合間中窪爲塘水滿其中而四面皆高不  
知出處又東透塢下塢間又復窪而成塘與前雖有高下而  
瀦水莫洩同之又東緣南峰而轉越其東則東塢大開深盤  
遠錯千陸環壑於下度其地在丹霞山南山嵐洞西南余謂  
壑底水卽北透山嵐者徵之士人云西峰下有入水洞水墜  
穴去不知所出從西峰稍下共五里是爲何郎鋪越鋪南又  
上嶺仍依東嶺行迴望雲籠高峰已在西北時出時沒與雲

釀雨皆其所爲雖山中雨候不齊而衆山若惟瞻其馬首者  
循東嶺南下嶽中有溪自南而來溯之行其東岸共五里路  
忽由水渡西岸而暴雨漲流深湧莫能越方欲解衣赴之忽  
東山之上有呼者戒莫渡招余東上嶺行余從之遂從莽棘  
中上東嶺已得微道隨之南二里得北來大道果從東嶺上  
降者蓋涉溪者乃西道從嶺者乃東道水涸則從西水漲則  
從東也西流之中有一線深坑涸時橫板以度茲漲沒無影  
非其人遙呼幾不免馮河之險矣從東嶺下一里則大道西  
瀕溪道中水漫數寸仍揭而溯之一里有石梁跨溪上其溪  
自西南抵東山之麓至是橫折而西從梁下抵西山之麓乃



轉北去蓋其源發於西南火燒鋪西分水嶺

按志分水嶺在普安西南百二

十里即此北流經此又北抵黑山河郎之南不知所洩即土人亦

莫能悉也石梁西麓有穴紛駢縱橫如亦字故名其地曰亦

字孔今訛為亦資孔乃土音之溷也梁南半里即為亦字孔

驛有城倚西山下水繞其東焉比至雷雨大作宿於西門

內周鋪

東山之北齊平水河長數里余東裔孫

熙海南校字

隱山水巖西巖而暴雨暴發其勢甚猛其流甚急

滑其流南平壩中存貯自南而來之水其東距其五里

第四册下終

